

南海先生詩集

四

康有爲著

康南海先生詩集四

商務印書館發行

憇園詩集

康南海先生詩集卷之十二

後學東莞崔斯哲手寫

德宗景皇帝百日喪畢剃髮哀痛無時感賦

白髮耗：百日垂黑鬚盡白亦茲時明良遇合終天
痛喪服禫除及禮期剃髮六根終不淨感恩千古只
含悲孤臣首疾何能解永放江潭與海湄

庚戌三月七日□□□□□□□□□□繞行

檳榔嶼携旗理觀山海

游山觀海醉酒卧簟聽哥夢醒簾影燈影花影浪聲
蛙聲蟲聲

庚戌三月廿七日閱報有作

破甕顧何益臨崖足久垂勒嚴背水陣超軼樂天思
身病得心樂途窮入道資人天遊戲久成壞亦何悲
到坡三邊舍館數月中自庇去坡由坡而港由

港而西貢後復還坡追舊感今而賦

冥黔席暖亦何曾浮海居夷已不勝
天地只為行旅宿歲時常作打色僧
多情懷舊誰能免着意開新我
尚能道里經過五十萬應無所任任騰：

十二月二十三日在星坡海濱之丹容加東深
夜起步看月觀濤海浴有感

岸崩路折白沙橫捲雪驚濤拍岸驚
碧海青天漸澄

澈疏星孤月見光明二三燈火知船泊數四漁燈趁
夕行歲晏幽人依絕島夜來海浴聽潮聲

庚戌十二月再還新加坡菽園三書請助卒歲
計並出新詩百餘相示追思庚子立儲之變
菽園因迎吾來坡為之感慨

前度康郎今又來桃花開落費疑猜十年來往星坡
夢笑指蒼桑變幾回

昨夜雲開見月明
天容海色漸澄清
釣竿拂得珊瑚樹
猶聽老龍噓浪聲

與邱菽園論詩跋卷尾三首

滂沱吐出作歡悲
懷抱千秋八表思
偶尔起予三尺喙
攤箋百紙又論詩

論詩竟夜已天明
起步園林萬綠生
皎日騰升諸境現
高邱曲演九州成

鳥啼花放知何世木繞雲陰自在行
別有諸天十世界化城無礙起縱橫

又七月初一矣

久客何年了移家周歲中海門濤拍岸
鷄打樹環宮雨濕檳榔綠雲烘關順紅
著書空老矣故國又秋風

關順花木本高數丈花大三寸許開滿樹
秒南洋各島多植之弥望如霞蒸

七月十四為梁俠士鐵君殉節日陳酒祭之

詔書立憲日烈俠捨生時槌鼓彌衡罵誅心司馬知
驪龍誰敢捋毒鴆死堪悲陳祭年：淚思君共酒卮
遺骨埋榛莽三年竟未收撫孤愧丹口去國尚扁舟
義俠他年史香煙絕域秋卅年生死友哀痛望神州
仙鶴長身立雲龍遠氣豪日光岩下雷兵法洞中韜
超世得禪佛雄才可節旄從亡十年事明月碎波濤
前十年此日鐵老從我在星坡移丹
將敦燈島

與旃理晚步憇園北坡旃理感秋思親請賦詩
予懷亦同口占

木葉亦已隕秋風昨夕生繁花紅萋地茵草碧連城
搖落仍生意蕭條對晚晴漸看華月上萬里共圓明

枝影葉

南洋草本有葉大數寸內
藏枝葉影誠異種也

綠葉疊萋々倩影迷夾蝶碧質而綠綠圭璋賦理擘
嫩紋織綠緯中有枝影貼

諸葉間長短中條長亘接只聞殭化石豈見枝影葉
昔劫適何時前塵今尚懾

菽園絕世事而苦吟其詩精深華妙大成矣

採葯靈山歷苦間一朝換骨得金丹驂鸞化鶴飛升
去俛視腥膻人大難

庚戌除夕居星架坡海濱丹容加東与旃理步
海沙攀松石長椰夾道夕照人家接目皆巫

未由吉寧人去國十二年傷存念止雲物淒
：遂有浮海居夷之感

大海波濤拍岸粗疏椰夕照帶蘼蕪居夷久矣年運
往吾道非耶曠野孤松石頑嬉笑山鬼乾坤偌大着
潛夫似聞朝議思隨會諸夏顛危誰與扶
竇陳蘇馬自千春放殛誅流痛黨人鳳靡鸞叱經浩
劫天旋地轉念維新劇憐埋骨多君俊更痛攀髯轉

聖輪漢相帝師傷拱木楚囚學士又風塵
出亡歷：十三年國事塵：夢化烟聖德神功帝何
力維新立憲史誰編雲陰解駁明孤月海色澄清通
碧天共痛冤飛柴市雪昭回衣帶日高懸

宣統二年秋九月大開嘖室贊新謨廟堂何意排羣
議民猷同心遇百夫安國舊勛思樂毅射鈞往罪釋
夷吾移書欲放逋臣返雲物淒：尚海隅

時資政院
議員請向

禁黨

聞高麗亡日俄協約且有蒙古遼東之約痛慨
感賦三章

坐看東海竟揚塵太極茫；轉日輪箕子為奴今及
裔庭堅不祀最傷神千年圖史空王會八道河山痛
種人長白山頭雲黯；更愁鴨綠浪鄰；

趨朝曾憶廿年前五鳳樓頭日耀天紗帽綠袍穿陞

仗朝元賀朔入班聯沈：渤海驚龍戰滾：邊塵壓

鴨川可笑降王娛帝號曾供傀儡十三年已丑年元旦朝會曾

遇高麗使于太和殿門綠袍烏紗帽象笏送送九品班末也數年後短衣後裙送各使後鞠躬矣

撫桂親披職貢圖先叔祖中丞公撫桂林時越南入貢宴之巡撫大堂巡撫中坐司道

側陪貢品陳庭使臣侍郎阮某拜跪階下登堂賜坐于地而宴之曾拓影焉吾年十五親見之同治辛未

也卅年世變色模糊越裳香象無踪跡緬甸金花可

有無鬱：祖伊奔入告哀：天帝醉難呼琉球高麗

誰為盡瀚海遼河更可虞

仲廉二弟最孝謹久別八年患難遠離祠墓田
園皆賴弟香泮重見懽然贈歐土物弟無受
但乞詩字因寫贈之並寄季雨四弟因傷感
幼博

逆弟平生馬少游十年憂患隔滄州勤：數馬傳孝
謹站：飛鳶念毒愁痛發先塋難作記惜非吾土強

登樓掃除祠墓唯憑汝夜雨傷神最感秋

辛亥人日立春星架坡海濱曉起視萬綠匝地
嫩晴濃熙皆椰蕉棕桐鳳尾草不得見故國
梅花牡丹也寄任公孺博曼宣與薇女

棕蕉匝地草侵沙淋氣晴光映綠椰乍見嫩春如好
女惜居絕域寫年華花球牡丹移畫舫燕臺芍藥照
人家而今碧浪盈：海人日題詩寄昊霞

晚潮捲浪岸淘沙夕照斂烟天滿霞隱
：青山轉帆
艦深：綠樹隔人家曾携婦孺尋螺蜆網集漁人得
鱗蝦喜入立春又人日醉眠芳草忘天涯
飛鳥驚枝天欲曙候蟲吟草月微明深宵不寐頻歌
枕似聽三邊鼙鼓聲

憇園北坡晚望携旃理同疑

北坡煙樹鬱槎枒被徑皋蘭芍藥花却指高邱樓抗

頂周遭綠樹倚紅霞

新□□□聞警

噴室無靈民獻空熏天復燄贊元功
春來準買千金笑花好難留百日紅
可是賜秦天帝醉恐傷懷楚大王
雄楚歌四起邊雲擾感國哀：思大風

海運支離入南溟陸沉淒惻歎中原
晉陽已過猶增獵關外環兵尚禁言
縱敵患深貽數世和戎割讓擅

專門海枯天隕今何世東望神州只斷魂

二月花朝夕携何勝旃理水塘步月還憇園聞

木樨香

月明如水浸湖隄淡々金波煙何低白石蓮花見燈
影紅泥檣樹送輪蹄祖師禪意通葡萄居士香聞證
木樨繞屋循廊光可掇花陰樹底霧微迷

送春

春盡星坡又一年鳥啼客去草芊芊
：花開花落供惆悵
天雨天陰總可憐
倚閣三杯婪尾酒
游園五色並頭蓮
獨愁鞀鼓催春色
夢入東華只愴然

辛亥夏五月自香港重游日卒廨任甫須磨雙
濤園築室同居與任甫離居者十三年檳榔
嶼香港一再見亦於今八年矣兒女生於日
卒皆不能識相見如夢寐任甫賦百韻詩先

有四律奉迎答以四律

大浸稽天痛溺淪惟吾与汝拯生民身經百億萬千
劫我是東西南北人黯：春明有餘夢泊：海立盡
成塵團沙易感傷身世十四年來幾轉輪
交魂通夢八年餘檣嶼香江嘆索居九大洲中我行
路二百國事汝成書幾閱變遷驗家國屢驚生死送
居諸同心離處憂傷老秋水相望恨有餘

清淺忽然見河漢風颭不復阻蓬萊洶；碧海洶浪
靜謐；青松聞籟來執手似經灰剗別傷心重借酒
杯開成行兒女皆新識異域驚看喜復哀
湏磨月照萬松青東海決；納一亭風浪千帆如不
動神山羣峭想飛靈南村卜宅樂晨夕九世通家傳
諱經頗笑預人家國事耦耕浮海拚沈冥
題梁任甫所藏唐人寫維摩詰經

我生視書古為僻未見唐人之筆跡
江南京北覽藏家僅存宋後寶
拱璧昔者歐遊覩古物埃希羅馬多
遺墨邦淖忽露古城畫歌林近發
舊都刻摩撫丹墨數千年惆悵吾
華安可得雲風洞窟何茫：石鎖蛟
龍寶氣藏碧瞳綠髮多好事千年
石室發燉煌玉檢金泥裏百箇
龍威鳳篆寫千章一船書畫巴黎
溢五車秘怪燕市光陳農求書
白馬寺杜春挾簡金絲堂

散落人間尚千百紛紜眩筮而探囊我從南洋望北
極石渠怪發動未央竭來須磨雙濤閣海濤松濤生
清涼任甫手持唐人寫經卷妙墨逋峭寫硬黃隸意
尚存北齊勒筆態頗近誠懸莊鉄網交如珊樹折仙
樂嘈奏回鸞翔所寫淨名經一卷菩薩行品尤深長
不染不捨無淨穢是逍遙遊之神方半生行道長挾
此日飯三升毛孔香我本摩詰所化身衆香國裏吾

久薰偶來濁世任斯文預人家國亦艱辛頗慮牽率
為世醺日讀一徧心耕耘神遊諸天身入塵地獄天
宮亦何分斯卷破煩之六軍著茲古墨誦勤：豈止
古物僅藏珍因此證果散法雲震動六極大千春

題梁任甫海桑吟畫寄林獻堂

東敗昔割臺吾方在公車孝廉三千人伏闕哭上書
鳴鼓守臺官連軫塞巷間臺灣有人士血淚灑大夫

吾時從旁觀，惻痛切肺膚。終為秦檜阻，行成割地圖。
人士絕往來，旌節亦已無。哀念吾種人，驅為亡國奴。
未知新邦政，困苦果何如。遺老林獻堂，好義薄雲衢。
任甫與邂逅，遨遊遂與俱。鹿耳與雞籠，周歷千里途。
遺黎夾道迎，聞聲相歡呼。

辛亥夏來日本，湏磨居任甫。雙濤園築小樓十
弓，臨海名曰天風海濤樓。室成與任甫覺頤。

樂之兼寄若海索和

海外逋亡十四年，又來須磨結三椽。
紙窗板屋生虛白，夕靄朝暉覽萬千。
松罅舊亭立前後，丘中曲徑得迴旋。
小樓坐大吾知足，吞吐東溟占碧天。
雙濤浪拍與松篩，海碧山青日月移。
丈室可施花雨榻，故人□寄草堂賢。
白波萬里如舟入，青蓋千株繞壁歌。
遇眼雲煙渾欲忽，側身天地更何之。

新室成十四夕與旃理倚樓望月

明：今古須磨月夜：飛雲送入樓海色天容行朗
：松聲濤浪辨悠：人天斂籟常盈耳舟屋繙書笑
打頭空相音聞得清淨烏皮几在且休：

辛亥除夕前三日再游箱根看玉簾瀧

夕照連山蒼翠黏渡橋逾澗石□□天教閒領佳山
水半日重來看玉簾

橫濱大同學校十五年紀念慶典恭承頒御書
匾額而鄙人又適再東游躬襄其盛喜賦祝
詞

光緒丁酉秋舉國猶守舊庠序徧都邑講授皆學究
祁：趨胄子翹：烈文囿埋首八股業閉戶三家陋
嬰兒誦周易不解同梵咒禮樂射御數古教盡遺漏
歌詩舞象勺學語之不覲豈知四國為何況大地厚

以茲人材之適當大變湊歐美發科學教法日新奏
日本先取法學科得步驟期：愛國心磨激更日富
用致勝中俄本在文學鬪十萬毛瑟鎗祝此學童幼
華僑多志士發憤思自救同心構學校好施共奔走
分科良美備流風遠被覆子弟既多奉邦人咸輻輳
全國立新學此校實導首昔謀立校初遠與我邂逅
大同錫嘉名遣師與先後逾年戊戌變東來覽蕭構

侁：蒸髦士萃：陳俎豆一別十四年汗漫歲月質
春蘭與秋菊日聞挺英秀王路紆阻纓郡縣充教授
或遊歐美學或入江戶胄翮：百餘士好學多成就
老夫在東美回望神山岫桃李已芬芳手植嘉樹茂
坐觀翔飛雲回思撫荏□朝思遠不遺御書宏獎侑
仰瞻卿雲題欣逢吉日茂志學遺嘉會乞言歡飲酌
更望鬱棟梁斐然先瑩秀雖遜鹿洞風却挹文翁袖

神州起夏聲多才作人壽

與麥公立游淺草動物園石瀑溪橋幽甚

愛坐池亭日已曛堆山激水浪成雲泉聲在耳瀑在
眼開市深山境未分

池橋頻徙倚泉石證聲聞道入鳶魚際人將鳥獸羣
昏黃日將夕林翠瀑生雲待月頻張樂華嚴語幾分
夕與公立入飲酒寮及出而泉瀑忽收蓋以人

工為之制機即止可悟入無常而證非：矣

酒爐從醉卧泉瀑忽收藏乾溢□冬夏遷移驚海桑
光猶留白電夢未熟黃梁寧待四門悟天人豈有常

携媵何旃理及姪女同荷遊宮島寺

同荷為亡弟幼博女

時肄業于日本女子大學

少日讀書白雲洞今來宮島又相逢危峯上月夜生
白萬木遮雲午聽鐘亂石當樓多磊：流泉到枕自

涼：泛艇弄潮看海寺故山回首杜鵑紅

遊廣島

羣山開廣島十萬關人家兵氣雲藏壘軍威馬踏沙
泉庭樂水石行殿倚山霞海水知深淺通渠蓮白花
若海遠自京師訪吾于日本須磨縱談弥月見

贈二章次原韻

披髮升天攬大荒舊鄉臨晚忽徊徨人才誰與共大

事國難寧能忍舍藏風起雲飛思猛士天旋地轉痛
先皇紫眉若士真英絕百尺樓頭湖海蒼

環轍歸來久白頭人間徧閱更何求夢華尚有山河
感大浸能無灰劫憂傾缺乾坤猶欲柱風颺郭李且
同舟多情來看湏磨月夜：聽濤嘯未休

再宿塔之澤環翠樓主人鈴木出吾舊詩札隻
字不遺口占即贈

十四年前曾遇客而今三繞地球回山林鬱鬱仍環
翠泉瀑潺湲尚隱雷再卧故居真似夢新添白髮共
登臺殷勤地主重談舊歷劫人天幾去來

醉早稻田講師桂湖村贈詩

乾坤浪莽久飄零倚劍崆峒歷歲星不意神山能再
到草堂風雨再談經

甲子元旦作呈

正

華嵩及來已除夕

六十七翁來古稀味

氣雨惠花竹醉柔
彩烟樵枵枵飛中元
甲子天心及外史康
中國事始更為立喜

正元日有逢吉語支璣
有為



納東海亭詩集

康南海先生詩集卷之十三

後學東莞崔斯哲手寫

甲寅除夕感逝

自延紹山莊撫棺歸車中口占

歲盡淒：總帳風人間萬事總成空
玉棺長卧思天上環珮歸來只夢中
歸國因緣六月息環球形影七年同
從今滄海看明月怕聽胡笳奏落紅

乙卯元日與孺博若海談國事兼寄乙老

逝波年運往多經，淑氣晴光春半醒。
風草茫：無故物山河莽：又新亭衣冠避地幾如掃。
滄海驚濤不忍聽五十八年憂國事，今年憂甚可沉冥。

遊煙霞洞

洞在南高峯麓有六朝佛像數十精妙迫肖神氣如生天下皆稱素欽雅

典羅馬刻像之精不知中國古舊刻像精能如

此實為中國環寶國人宜共珍之洞外巨石離

奇梅桂數千時當

八月桂花大開

萬木森：磴道迴桂花影裏記徘徊，燃燈列佛笑迎。

我似為破煩招隱來

經年易劫尚山青
洞裏沉：佛未醒
酌取錢塘一江水
烟霞痼疾願沉冥

再登韜光

萬竹盤青磴道分
北高峯下一鐘聞
左江右湖供一酌
足踏飛來頂上雲

泛舟遊公園

園本舊行宮二十七年
前曾遊之乙卯歸國再
遊朝市則已改公園

為之感慨

湖波澹蕩捲寒風
夢入華胥事已空
二十七年春色
過煙迷雨冷憶行宮

乙卯三月重遊高莊

光緒丁酉九月携長女同

令錢塘館我於高莊越年戊戌蒙難走異域雙
遺殉難而終忽：十九年不意再能來遊也循

覽林館感蘆愴懷從我偕遊
者門人王公裕鄧百村也

湖水仍清柳放綿
高莊庭戶尚依然
記携弱女曾三

宿蘇武重來十九年

重遊三潭印月

此島築于北宋時在西湖中內作四湖三島以三十折橋通之

老柳環堤紅荷滿水千年舊物得此為歐美公園所無吾遍遊數十國歎為絕景

湖中有湖島中島三十折橋堤柳早開紅一舸入荷

花三塔猶存明月老

島外有三塔塔潭同音碑文誤寫作三潭

遊靈隱寺飛來峯寺經燬後重修甚麗殿前石

塔無恙重摩有感

焚餘殿閣又莊嚴百劫歸來問塔尖
大熱泉聲猶作冷已空山色不妨添
亦知成壞原難免閱盡興亡自
不嫌我與飛來峯去住雲林新月上纖

乙卯三月二十六日送春詩

園林半割幸偏安萬紫千紅竟送春
驟雨連朝太無賴憑欄盡日最傷神
坐看落花隨逝水又驚寶馬碾香塵
閉門莫道東風惡只見啼鶯不見人

跋鄧完白山人登岱圖

雲氣蒼茫日觀峯登高望海若能從精神飛揚天地
外始識畸人亦赤松

題張叔未寫阮文達北湖草堂圖

文達有詩

高樓文選摘星光尚想風流蘓草堂逸筆百年張叔
未北湖荷葉寫遺香

嶺海文翁學海堂今為瓦礫最堪傷勞君馬踏搜殘

像付此畫圖衣鉢藏

題羅兩峯仰首問天圖

兩峯自題前身花
之寺僧

陸沉慘：樹搖枝仰首呼天呵問時被髮大荒空莽
：前身明月又花之

偕若海公裕品茗不忍池中無着亭看月已而
病若海以二詩來答之

池亭呼取密雲龍知共佳人聽暮鐘碧海青天無限

恨且看華月上青松

衆生有病吾遂病世界微塵我入塵玉宇瓊樓不歸
去人間少住未知春

題亡妾何氏所遺書畫詩

天女化為舍利弗本無障礙女男身散花究竟涅槃
覺學書初學衛夫人

發願為吾全寫詩畫樓春暖日臨池空將十紙摹梁

鵲留與家書說衛漪

魚山學行草谿筆留得書丹在
我家不寫簪花傳化度自然高
渾發清華

月竇風寒注逝川去年此夕奈何天
房櫳久閉塵凝草書畫搜遺墨滿
榆兒女悲啼倚燈下形容綽約步
階前更無入夢腸空斷且費扶鸞
問敬仙

智師一字五萬錢十字文無人間
烟旃理臨之冰雪

仙忽思纖手拂箋年

濃艷凝香帶葉妍粉痕墨暈態猶鮮而今落盡殘紅
後讀畫題詩更惘然

一枝濃艷發遺香賸粉殘箋空斷腸色相華嚴常示
現殿將畫譜拾羣芳

丙辰元旦感事書

又看春色到婆娑送暖晴光盪綠波正月無王思撥

亂普天後日望陽和可得自娛尊號上幻聞伐叛戰
雲多魯連豈肯秦稱帝目極三巴奏凱歌

甲子書猶晉處士庚申史作宋遺民百千劫後成灰
日十九年來去國身春發人歸尤感舊天旋地轉望
迴新草廬尚有乾坤在還我中原風日春

丙辰二月五日送君勉回粵赴義兵討洪憲篡
僭寫近詩付善伯歸示君勉

慘：滔天巨神州，恐陸沉行藏。吾與汝，弔伐古猶今。
撥亂春秋志，辛勤梁父吟。鷹揚廉耻將，四海所歸心。
丙辰三月十二粵海珠之變，譚典虞以奇才遭
難，哀而祭之。

雄武周公瑾，英姿正妙年。孤忠心不展，沉勇氣無先。
百中韞難下，千間厦未完。終無一旅藉，長恨咽黃泉。
贈鄭大鶴同年

海內詞人孰正聲
畫師樗散話居平
何當麋鹿游臺感
又見龍蛇起陸爭
燕樂孤微知石竹
樵風哀艷入
琵琶西臺鐵笛曾
吹裂賣葯懸壺斷此生

入山惟恐不能深
勾漏羅浮何處尋
欲問葛翁同徙宅
山樵妙墨有青岑

身世可堪逢百憂
萬方多難竟無休
死生契濶嗟吾輩
烟雨迷茫話小樓

題趙管合璧畫

文采風流兩璧人，獨將書畫照千春。
武林舊事寧相憶，翠竹蕭然世外塵。

女夫羅文仲官廈門海關同璧女赴任題趙管
合璧畫與之

水晶宮裏兩仙人，書畫流傳並絕倫。
玉潤冰清得歡喜，明窗棐几助精神。
竹蕉深隱人世外，木石與居山

海濱付汝如賓舉案暇酒闌似見古之春

為茅山乾元觀保薪木及虎丘半塘龍壽山房
所藏善繼禪師血書華嚴經求建塔保護呈
震嚴同年

僧寺鈔經道觀花兩般風物擅中華代告使君為護
惜免流外國毀泥沙

同璧女赴閩官舍題吳白花卉圖與之

梨香雲漠：飛燕雨微：雉雉飲啄樂醅靡春事非
雜花成錦地孤石倚苔磯應有看花者無言夢自歸
偶感

先德梓鄉碑有口棣華燕市蓋曾傾浮蹤遺共壺天
聚下里偏邀白雪評春夢一場供劇哭花潭千尺感
深情臣愚自蹈亡身禍敢向青閭訴不平

積之弟六十壽寫寄

積之仙人姿生本非凡物久薰衆香國累刳浸肌骨
天性自近道不為腥膻汨純粹而好奇乃不為庸物
至常非常義廣納而肆出少打細腰鼓折節服道術
冠乃獨尊孔宗學守兀：頗愛袁了凡勤：講陰騭
以為可補儒實惠民物活家世桂林秀一枝尤挺出
春日重題大觀樓二首
樓上春雲住又飛樓前春水綠生肥舉頭莽蕩身何

處釀酒蒼茫醉未非三島游仙他日夢五湖垂釣幾
人歸毬場牧馬將軍老誰話天山雪打圍
湖花湖柳此依：天下春光兩燕飛好水自頭連尾
看諸山從古到今圍百年作客原如寄竟日登樓只
不歸此曲莫傳王粲和怕教遊子淚沾衣

懋華陰廟

漢柏秦松白帝庭：前晝夜走仙靈殘僧不管人間

事卧看芙蓉萬古青

漫題

種菜英雄老遊山婚嫁遲仙名留美飲官職折吟詩
肝膽今誰照年華有鏡知飛鴻杳天際獨立看雲時

外物

已能外物知朝徹未至非人尚夕飢驚說凡亡猶噩
：慣看星隕入非：面依牆壁山巖坐手擲髑髏雷

雨飛世界八千頻往返可憐萬物入于機

贈龍積之

太清吐瀟漳青城遊絳闕龍子鸞鶴姿道氣非凡骨
薰香自累劫芬馨浸肌髮靈山昔有合補處無量佛
同發悲憫願欲拯飢溺活示現來問世辛苦充寶筏
天然好道心一生抱明月雖現宰官身無礙得解脫
禮樂本天性青雲月照豁汎愛教無類善誘義妙發

恍：投岸獄鬱勃談理窟出入天人際
豢龍在一鉢
固窮超榮觀汗漫衆芳歇世界幾百億
賢劫幾變越
神遊亦無量萬佛同颺忽推我不忍
心勾留救民疾
卅年舊因緣老矣相濡沫海上重相逢
銜杯祝鯁噎
願長生未央明德追曩哲

庚辰三月十五日訪蘭亭

縱觀宇宙水精庭同時裙屐並高名
禊序昭陵劫幾

經二千年蹟贖蘭亭清流修竹相映碧峻嶺崇山猶
自清春和天朗吾來口悵望蕭條幾換星

遊柯巖

柯亭竹笛不能見柯巖峯石猶挺竒烟霞洞深七星
墜潭水清澄誰樂之

探禹穴俗稱禹王陵有窆石即葬處窆石頂穿
傳是太白作窆石中有宋刻字數處與泰山頂
之沒字碑並為最古物

莽：羣峯萬馬騰龍蟠禹穴看雲升
委宛神靈存石紐會稽草木護
王陵中華稱夏人思創洪水平灾鬼
與能安得同遊遷與白金瑩玉簡
擁霞蒸

鏡水稽山舊夢遊千巖萬壑秀爭流
山陰道上接不暇百里春谿一葉舟

登紹興城中虎山故越王勾踐棲甲士處可俛
望百里城郭山河甚壯自古為雄郡惜今改縣

虎山蟠據侑城中甲士三千棲越雄十萬人家烟樹
碧山河壯麗惜春風

偕徐子靜侍郎登杭城：隍山遠望

城隍山即吳山

立馬吳山攬遠空錢江滾：浪流東左江右湖樂無
有鳳舞龍飛勢自雄隔岸峯巒奔萬馬舊都王霸見
羣龍南高峯側堪惆悵十萬人家烟樹紅
為退思齋主人題垂釣圖並祝長壽

漠北旌旗萬馬看，老歸心事託漁竿。
寫畫小兒呼造化，製瓷舊國記衣冠。
壽人笙磬來泉石，少日勳名識鳳鸞。
度世行慈紅十字，買山深入碧千盤。

龍井

丙辰夏六月二十日陪徐子靜侍郎文鄭浩義卿袁鍾瑞仲符斯明做吾龍志澤伯純徐肅澄秋仁釗勉甫池鑑清子美与嬌羅昌文遊龍井

再來飲此一泓清，碧蘚沿崖聽水聲。
卅載四來經幾劫，青山仍淨証無生。

破寺蕭條佛不尊
辯才抱朴認茲身
我亦東坡久遷
謫修篁古徑重溫存
人世何須問濁清
名山且共聽泉聲
茶香水熟羣相
屬潤我枯腸
詩思生
幾度滄桑道益尊
髯翁合許證前身
破除煩惱渾閒
事得伴清遊至樂存
亂後寺庵皆遇劫
我來龍井一茅庵
卅年樓閣華嚴

現常清功德在禪龕

烟霞洞

十載光陰首漫迴烟霞重到益低徊
齋房蔬圃都非舊似共滄桑變易來
劇談共對佛鐙青敢向塵寰詡獨醒
天道神明佑賢哲肯容出世託鴻冥
半生憂患尚何圖不信賔酬□□湖
老我猶能鼓遊

興前塵如夢有還無

理安寺

十年前到理安寺
細品芽茶酌乳泉
塵世于今幾經劫
清遊相聚有羣賢
濃陰滿徑堪忘暑
長嘯舒懷莫問天
忽覩帝師遺墨妙
追維曩昔又淒然

有寺僧出
翁常熟墨

跡相
眎

迴馬嶺

崇巘陡崖人面立翠華峯麗不能躋我來策馬休迴
顧更自壺天一綫窺

泰山磴道撫秦五大夫松及四唐槐

尚撫唐槐四君子空號秦松五大夫槐幸婆娑有生
意松為寄託乱真吾

御帳屏

峭壁摩天飛瀑跳珠山色如鉄乃知北
宗畫所自出

羣峰環翠積鐵立飛瀑如簾濺玉聲北宗畫境誰能

識佳處無如御帳屏

題吳氏雙照樓刻詞集皆影宋元舊槧自王半塘四印以外為最精矣

活板流傳刻板收宋元槧影孰能留半塘以後刊詞集海內無如雙照樓

題蓬萊宮闕

曾瞻宮闕壓蓬萊一去滄波竟未回
偶看畫圖憶青

瑣市朝已變劫餘灰

左子異宗承以左文襄公少像屬題先中丞公

諱國器戰浙閩粵時隸左文襄公麾下幾十

年吾家長輩多從軍先君少農府君亦在軍

草檄吾少年仰望左文襄公如雲日以未得

見為大憾恭覽此像少年已氣象萬千欣喜

敬題

抱膝隆中亦異哉
虎頭犀頂非常才
當年趙普蒙師日
豈識風雲萬里來

丙辰秋八月登泰山絕頂登封臺東過日峯觀
日出俛視羣山極望感懷鄭義鄉及門人王
公裕鄺壽民同遊

碣石飛流四百島
玉檢登封七十君
大宙飛揚觀日出
萬峯奔走俛層雲
金銀仙闕通天帝
青赤齊州涌

地文此是崑崙分左股乘龍臨晚日斜曛

度泗水望曲阜

汶上昨日見泗水今午涉其廣數十丈深尺度車轍
岸沙廣浩：當上泗漲沙人可負戴度小水何足說
所貴近聖居喜容動眉睫翹首見嶧山峰勢猶巖孽
豈必山水佳童時耳聞執愛屋及其鳥况先聖過跡
昔將到鷄足想瞿曇行乞後望伯利恒想基督游歷

況在洙泗間夫子曰行役車馬前揚塵尚想周流跡
漸瞻曲阜城日射黃瓦脊予懷三十年今始慰望極
登太白酒樓濟寧人士請寫樓額

太白曾携玉杖遊城樓酒熟占千秋我無謝眺驚人
句只為先生題酒樓

濟寧夜將登車行秉燭往訪文廟漢碑勞文武
長吏陪遊

□ □ 傳呼燈映騶廟堂秉燭事勤搜此來為撫漢碑
碣慙愧羣官陪夜遊

丙辰九月朔游鳳陽龍興寺明太祖為僧處碑
甚多有六銅鍋四乃題太祖像

壞寺頽牆照夕陽銅鍋石碣總荒涼龍顏隆準開皇
業畢竟劫中僧一房

由帝而僧清世祖自僧而帝明高皇兩朝開國勛何

盛一例披緇事可傷
早識色空無障礙
難逃成壞感
滄桑龍興寺裡龍顏在
袞冕袈裟傀儡場

遊鳳陽明陵：距鳳陽城十八里

山河雄壯四飛揚
遠自嵩華王氣長
誰識王陵風雨
泣竟成高冢起高皇

久已銅駝歎棘榛
于今石馬委灰塵
御碑紀實微時
事五百年間只愴神

重九前二日遊莫愁湖第三度矣寺僧出端午
橋尚書莫愁圖題卷末

一角城牆百項荷六朝金粉曠烟波湖山應讓佳人
領免使爭棋劫局多
油壁香車三度遊石城艇子正清秋人民非故湖仍
舊三十五人口白頭

尚書舊事空回首霧鬢風鬟有所思省識春風留感

慨江南山水漫題詞

重九登金山塔今新修矣寺前沙州又新生者
丹徒令章君覲瀛置酒寺中僧出紙請題寫
二詩付與

七寶崢嶸倚塔尖重來樓閣現華嚴妙高臺上登高
望感慨滄桑洲渚添

烟蕪極目際天高江山如畫幾人豪羣峰西走勢屹

大江東去浪滔：

九月重九夜十二時登焦山宴畢趁月渡江楊

春普章觀瀛汪甘卿陪登

焦山高處最高樓吸盡西江滾滾流
海浪天風吹不盡遠烟淡月見揚州

江月蒼茫江水流遠蕪燈火見瓜州
浪聲樹影夜烟色重九焦山秉燭遊

遊濟甯鎮江觀者夾道

□□前驅笳鼓闐車場城角火燎天後車賓從乘數
十夾道女士人萬千到處聚觀新法祖此行望似大
羅仙游山深愧成張蓋壇席神明何敢焉

別焦山

又與焦山別江流無盡時風濤常獨立花木不離披
□□□□□天雲好護持名山又有待後約再來期

再登北固山寺僧出紙請題江山第一亭同遊
為汪甘卿觀察章覲瀛大令

獨上江山第一亭
烟蕪水浪帶藍青山顛
石壁皆通峭
天末樓臺幾醉醒
昏曉乾坤似吞吐
海門日月欲沉冥
古今淘盡誰人傑
浪打磯頭倚石聽
登靈巖山携兒女
同復同環同錢同凝
同倏遊壞塔嵯峨磴
道迴俯吞萬頃太湖
來宮花宮草蕪蒼

莽山鳥山雲鎖綠苔響牒無廊空石壁采香有徑繞
琴臺猶循御路遺磚在落照銜山亦可哀

抗殿冠山作館娃玩華井裏賸蓮花扁舟終泛五湖
去佛日寔知千劫差頑石蒙茸僧尚醉靈巖棲隱夢
為家笑携兒女騎驢去暮碧松烟一徑斜

丙辰八月鄧尉山看桂

邱壑重深夾路松梅花未發桂花濃碑亭珍重晉時

墓寺閣莊嚴周代鐘香海人家三十里太湖波浪百
千峯慙山說法空：矣但醉山嵐與水容

題王定甫先生娣姑課誦圖

風節文章獨秀才通家孔李服丰裁豈知誦讀孤童
日卻自秋砧娣女來
梧桐秋影月光寒砧響書聲共夜闌我亦姊歸資誦
讀遺經淚濕不堪看

輓鄧筱赤宮保文
卒年九十丈與我言國事話及先朝即淚下吾歸國來只公一人耳又戊戌吾家產被沒丈自出首名為請于政府給還感丈厚德惟以文章報之

國老誰如伏生壽靈光驚近泰山頽似聞威惠流旌節誰識孤忠淚劫灰避地耄期猶作畫補天色石媿非才償還沒產勞公請報以文章寫我哀

甘翰臣得石濤畫餘杭山色圖請題

天目羣山龍鳳翔峯巒青綠竹松香去年驅馬西溪

路盡入清湘一畫囊

乾嘉老輩幾題詞流入陀城又幾時熊氏印章古樵
句重歸粵客護持之

國破家亾花石網青城人往最蒼涼可憐歌舞湖山
後舊國回思盡可傷

夢華那復錄東京士女當年樂治平風景依然在圖
畫上河佳日記清明

印色模糊有十洲
鈴山興獄枉豪偷
于今四百年灰劫
絕世丹青我卧遊

贈侗公

落花流水帶平蕪
天上人間春盡無
國土華嚴猶可致
家居□壞抑何愚
每懷先帝慚衣詔
哀念王孫泣路隅
鬱鬱五陵佳氣在
五孃畫好且堪娛

答梁節庵贈詩扇叙吾訪之於鍾山書院舊事

花落花開三十年江南柳老想吹綿
星巖泛棹撥雲入烟許聯床聽雨眠

晚對松筠喜青翠中多風雪隔山川
鶴歸城郭皆非故共話滄桑只惘然

丙辰九月二十九夕題麥孺博潘若海為盧毅

安寫扇圖

毅安弟以孺博若海合寫詩詞請

而乙卯孺喪丙辰若殂誰與共天下事者每
念心痛欲賦不能下筆今乃攬筆哀之成詞

老淚猶
濕也

吾門房杜有竒才次第沉埋委草萊本是同心人合
壁痛看遺墨劫餘灰掣鯨碧海詞猶壯賦鵬長沙命
可哀吾道窮乎天喪咒灑將老淚濕青苔

君和仁弟別十九年重遇海上感贈

文正之孫惠敏子二十封侯長御史門多列戟十朱
輪兄弟侯伯國無比珊瑚鞭玉勒走沙隄一擲百萬豈

豪侈侯門當年盛煊赫吾猶及交群與紀猶憶惠敏
捧手時入吾卧內翻百紙覽吾內篇激賞之謂在吾
國歎觀止豈意蘇武亡外十九年化鶴歸來易朝市
文武衣冠異昔年王侯府第易新主君家田宅被封
沒丞相祠堂奪筵几故侯流落無所之東陵種瓜今
已矣秋風萬里吹江水海上重逢話光緒戊戌朝士
已無多式微式微何瑣尾哀公孫兮胡不歸嘆城郭

是兮人民非侯其自愛保前徽佳氣安知無光暉我
心惻：芳草菲

僅叟侍郎丈生離死別凡十八年乙卯十月訪
吾滬上吾居申嘉園十日朝夕銜杯話舊聞
書讀書為平生未有之懽昔曾生祭今得生
遂皆相逢出意外行時贈詩謹和韻呈正
生祭哀：死別空豈知遺老尚存公劫經故國滄桑

後春入先生杖履中一日為懽杯酒裏百年話舊水
流東水深浪濶天游慣來往風流對阮窮

丙辰十月七日宿茅山陶隱居松風閣懷僅叟
侍郎年丈並示勉甫弟

猶記西湖共月明畫船檀板醉歌聲老年病疾憂之
甚舊事淒涼聽未平喜見重孫得聰令追思故舊歎
凋零茅山高卧松風閣南望錢塘秋水盈

聞丈病憂甚即欲赴

杭後知病已
乃遊茅山

祝左逸叟宗丞四丈六十壽辰丙辰重九作于

泰山頂補祝

峻岳弥天壽日長岱宗頂上作重陽百年高節見喬
木九日孤懷託晚香棲鳳舊巢掃痕迹戰龍大野開
滄桑大夫松老同摩撫復約峯頭再舉觴

題葛毓珊先生玉照

誰繼江村消夏錄
平湖又見網珊瑚
貞元朝士幾人在
好事風流得僭夫

丙辰十月偕李明庶楊嘯谷羅根登六茅山頂
仙山樓閣倚嵯峨
茅許陶楊跡已過
天外三峯青未了
羽衣雲蓋可如何

華陽洞裡無真逸
欲跨天風問上清
已就丹砂生羽翼
六茅絕頂好相迎

開歲忽六十篇

開歲忽六十元日歲丁巳除夕飲團樂羣兒鬧鼓吹
爆竹聲震雷紅梅麗繁藟雪花大如片飛來徧階砌
池臺鋪瑤玉林杳綴瓊珥天姥舞羽衣來獻新年瑞
巖服事上帝酒醴祀祖妣燈燭爛廊檻兒女歡饗饌
俛仰易元正感慨追我史長途行漫漶猶記當童戲
視彼耆舊翁相隔遠莫比豈料親吾身及此花甲暨

長江夜大浪扁舟渡揚子避雨蘇臺屋瓦飛立無墜
華德里落磚掠面過從耳假磚移半寸中腦遂已殫
大同書未著中國人無此廿八患頭風半載痛不止
羣醫束手謝自計亦永已蘇村延香屋瞑目將不食
令妻與壽母旁觀淚泚泚海外有良方書架得數紙
拚死妄嘗葯首疾居然弭海通大勢變萬國進猛鷲
中華猶守舊沈沈若鼯睡上自馬江敗下迄割臺議

不忍吾國危
七上書投匭
遭逢堯舜君
采納及封菲
震雷馳霹靂
變法除痼疾
維新甫百日
昭蘇動萬彙
北晨構呂武
讒慝遇宰嚭
毒霧曠堦臺
冤雲慘柴市
竟遭甘露禍
逮捕三千騎
閉城三日索
鐵路中斷毀
津滬並大搜
驚濤立海水
兵艦走飛鷹
嚴電馳遠迹
密詔命吾行
仲弢歌變徵
戒吾易僧服
北走蒙古寺
幼博長跪請
過津難自秘
吾生信天命
自得大無畏

經津登芝罘拾石罔忌諱到滬得偽詔正法着就地
驚聞上太行舍身投海汜英吏力抱我勸言宜少俟
艤舫多巨艦護我驅濤至十死亦不足幸免皆天意
己亥港省毋高樓夜遇刺開門正對賊隔案僅尺咫
大呼吾閉門驚奔賊走避乃改炸葯焚買隣穿地隧
吾適圖南行闔戶免於矮懸金五十萬購我頭顱貴
橫地浩茫：視天夢曠：庚戌居星坡又為敵所忌

健賊夜斬關車夫痛斷臂吾先及曉行破浪已遠致
天幸何多逢湘纍爾何恃廿年亡海外時：辦一死
遺囑繫衣帶恒幹付僕婢君危莫濟扶母病歸難侍
憂國驚溺淵思家軫病妍祭先顧無後望鄉歸無自
浮雲漫長空飛揚惟尔企頻繁歎絕糧質物盡簪珥
印度居絕域交通艱郵寄生兒大吉嶺瘞兒亦於彼
小墳向中華後顧無有嗣囊餘十四錢自分溝壑委

峩峩須彌雪天半橫峻□望岳歌采薇金石吟擁鼻
英雄方時來霸王自高視丈夫慣餓死傭保亦何耻
巖業鷄足山伽耶塔尚歸方塘十七龕有齋挾女季
山道夜深行白牛車緩弛山僧挾二挺防盜出與倚
危徑聞狼嗥深林憂虎唾驅馬哲孟雄荒山行日四
徑仄路又滑日黑驛未蒞下臨萬丈澗轟轟浪聲恣
林密杳無見山暝行彌遠前則憂虎豹後則憂蛇虺

長嘯愁猩猿一脚驚山鬼同壁投我懷揮刀捫壁奔
尺寸扶服行一步汗喘：出林見星光據石聽流駛
枯坐待天旦篝火露垣堦喜心乃翻倒得生倒酒匱
在德遺目疾延醫無藥餌腹痛摩洛哥不敢入郊鄙
洪濤渡西洋巨浪泛其窺吾道其非耶曠野多虎兕
生嗟人道絕死葬蠻夷肆豈天降大任拂亂苦心志
險阻與艱難重耳久歷試大地環三周四洲足曾履

那皮日不落北極看靛靛游三十一國行六十萬里
十九年於外子卿已暮齒竟逢唐虞禪已知舜禹事
新室善詐符曹社陰謀鬼謬假共和名只為篡盜計
四海飲泉狂九州慘鼎沸生民哀塗炭百物盡更始
九關布虎豹白日走魑魅學校禁讀經天孔廢禮祀
儀：睹飛舞攘：爭權利荃蕙化為茅芳橘變為枳
神社與神帝風晦泣壇壝鬼妾與鬼馬色悲供娛使

神州憂陸沈，湏磨悲憔悴。龔勝辱頻徵，管寧卧不起。
東海吹鼉浪，風木哀陟屺。白首奔喪還，朝市久變置。
重入黃浦江，若隔人間世。重望白雲山，毀龍難為祭。
重返銀河鄉，見塔若夢寐。重上澹如樓，摩挲七松翠。
愴然化鶴歸，人民似非是。蕭蕭茂陵樹，風雨泣荆杞。
敗棘銅駝傷，入河金仙淚。舊俗既遷移，教化亦淪墜。
大好舊家居，織兒撞破碎。神器既拆散，誰能造新器。

我歸一不識若異域人貴閉門未暇論無賢愚惡美
歐戰莽風雲申江遽遷次沁園艷池台書畫饒清閱
藏書廿萬卷四百畫在笥歐美亞珍物博搜集瓌異
少文為卧遊華胥夢酣肆山谷芳杜若牽蘿從園綺
漱松飲石泉搴芳采蘭芷歲晏孰華子種菜猶拊髀
巨君懷大欲託名置金饋騫然起巨波洪憲圖帝制
吾時遊西湖看管幾囚累翩舉脫樊籠懸賞猶密向

吾本淡蕩人魯連義不帝發憤呼義徒奔走易趙幟
碧海掣巨鯨大力曳負鼎蚩尤旗已滅噴室議尚異
五年三大亂虫沙可戲噉君子為猿鶴小人為螻螳
四海嗟困窮杼柚空筐篚機樞已停轉邦國無活理
中原試睨望澄清待攬轡蒲輪迎申公洪範訪箕子
執政虛旁求卻曲未敢詣崆峒多風雲橫天射長彗
鯤鵬負九萬千里假翼翅披艱掃紫氛太清澄翳滓

渺：兮予懷天乎胡此醉補天猶未能鍊石負慙愧
賢嚴幾歷劫蘭菊弋代遞新者日以親舊者日以徙
帝王與將相親戚及友紀山邱多零落吾生觀何為
古人多遭變無如我所被過眼烟雲中收拾色空裡
維吾覽揆辰五日月維二大火赤涼屋子夜吾生始
戊戌亦涼火藍燄禍先悖父老動色驚奔走咸怍異
書香再世延吾祖賦詩慰時秉欽州鐸名余欽為誌

摩頂受教告趨庭訓垂鯉康叔劉康公未知所受氏
代傳青箱業十三世為士十一齡能文十二覽傳記
連州觀競渡古詩二百字者宿驚傳誦神童謬譽擬
長受九江學大道濟其歲以聖為可學豪傑能仰跂
虹氣摩青蒼長劍碧天倚生性本淡泊握卷窮日晷
幽：雲洞與我：樵山峙萬木下擁書瀑流聽泚：
故鄉銀河橋故園七檜址淡月篩葉影落花滿衫履

金山望紅棉花埭種茉莉蓬館日游行綠暗鬧紅醉
究極天下畧研窮諸教旨著書遂等身發真除糠粃
講學得英才循陔奉甘旨雖嘗竊科第無情求祿仕
一生不入官好游有癖嗜樂豐草長林行山顛水溪
松霞弄暉變花鳥獻天媚漠沙山海巨雄竒入目眦
造物妙文章千紅更萬紫吾既生其中樂天受蕃祉
前哲竭心思制禮樂工技吾幸生其後羨樂略大備

合沓翕受之濟衆用博施若生太平時獨樂吾几几
豈肯預人國厯險冒詆誹無如哀民艱又痛國事燬
猥以不忍心百難遂集矢亡身及其親戮尸及先軀
三魂易斲喪廿載歌瑣尾臨崖足垂外蹶墜下無底
仰涎見鱷魚磨牙遇封豕假能致國強身殉亦樂只
迴觀中國勢墜淵日傾否空自覆吾家危身其餘幾
胡不為燕雀稻粱飽秦餽胡為慕巨鰲戴山竟流徙

喪亂俗反譎，置罟陷老佃。見人鮮佳妙，覩物得欣意。
林泉送日月，豈不得樂愷。舍旃復舍旃，避世永斷棄。
入山恐不深，友鹿衣荷芟。人外天海闊，逍遙無歌翼。
斯人既吾與，同患應大庇。萬物皆一體，諸天並同氣。
發願救疾苦，華嚴現彈指。中天俛雲雨，大旱待一溉。
瓦礫與腥膻，不厭人世味。往返曾八千，來此偶現示。
戮辱與謗攻，皆吾夙孽遺。于天固不怨，于人亦不懟。

化人之煩惱熱然亦何似世界自無量國土本最尔
陶輪曾一擲天地為傾圮八表雖經營僅若洽隣比
天宮遊汗漫地獄入惻怍豈敢憚患難但發吾悲智
撫鬚白成絲斷髮短以眊觀河面遷皺嗟余其老矣
唯吾滿腔春赤子心尚釋假年百二十吾志自強懍
形容日衰艾浩氣日壯厲縱浪大化中不憂亦不喜
江海幾浩蕩天人自遊戲

丁巳元日賦此得二百三十五韻沈培老布政言
古人最長詩只一百五十韻吾遇既竒援筆叙之
不覺冗繁非故施晉郊以示衆也

行年得六十壽逾天地老君試觀蟪蛄莫度春秋老
相彼螭螟巢微生物無數吾窺顯微鏡蠕動紛生聚
視虱如車輪其體骨已巨虱體之血輪有地球國土
析之萬億千展轉孳生譜累析及至微湏費幾時序

吾人之一瞬彼已壽千古精心冥推想比例難疏舉
然則六十年豈止億歲許以觀我衆生宇宙樂仰俛
行年已六十生性不知老或壽億萬歲恒沙無量數
坐視天人變生死輪迴苦國土幾沈滅星日多隕去
天行運不停日月舞六宇時放四光明化生茲后土
彗星觸之沉黑暗遂萬古開闔在所覺視猶頃刻許
山中千歲者縮短七日處視此六十年豈真比旦算

而何稱祝為謬尔僂耆父

丁巳元日賦長篇後意未盡而韻已將盡乃再賦
此二章吾生平所得在此也

丁巳二月五日覽揆詩付善伯蘋漪

久拚萬死碎微塵豈意餘生非壽人北海歸來如夢
幻東山興罷整乾坤同民不離人間世憂國猶存劫
後身老子婆娑思揆日鄉中扶杖物皆春

坐主顧漁溪先生別二十三年相見滬上用善
化相國韻寫呈兼介壽

神武衣冠□黑頭重逢劫後話滄洲心存故國旌旗
動春在先生杖屨游西北高樓宜望氣東南大澤且
披裘追思二十三年事介壽偁觴白可浮

失題

龍爭閭劫感孫吳魚釣淮□水一篙背郭堂成歸打

槩園林五柳似依陶

葱石參議兄藏小大忽雷琵琶為圖囑題不勝
古今興亡之感成三絕句

千載琵琶遶邏語曾入唐宮記得無猶聽貞元供奉
曲青衫濕徧獨愁吾
甘露園中有變聲遂亡唐室可憐生分明遺恨文姬
拍尚在人間亦可驚

曾得東塘樂府新
竟能神物合平津
劉郎已作逃秦客
一曲興亡最愴人

簷前櫻花四月再開
五月三度開
巡簷見之乃

占詩三首

一樹櫻花照艷霞
花飛春去委泥沙
綠陰紫實紅樓雨
不意華曇再現花

荷池銷夏日徘徊
三度櫻花又見開
巡簷索向高人

笑絕色穠花胡為來

姑射神仙絕世姿未能結實示情癡
忍教厭世求長往故現多生色相奇

聞瑩甫喪哭慟

衣帶詔同哭寧知永棄捐鶴歸非故物
龍去只號天家國遺多難市朝嗟復遷
憂傷人不永痛子天天年
雛鳳巢阿閣清如老鳳聲三蘇人側慕
廿載我親情

變法同經畫為謀最老成唯吾識君子思子淚盈：
三月見僅老追思戊戌別十八年步韻
死生同契濶滄海痛橫流絕望寧能見喜逢翻化愁
天猶遺一老人各自千秋但祝西湖月長圓為我留

美森院詩集

康南海先生詩集卷之十四

後學東莞崔斯哲手寫

丁巳五月八日與善伯偕沈子培尚書王聘三
侍郎乘津浦鐵路北上九日至豐臺望西山
呈諸公示善伯去國廿載不意生入國門也
廿載涼離逐客悲國門生入豈能知長驅津浦有今
日大索長安憶爾時朝市累更哀往劫天人合應會

佳期西山王氣瞻葱鬱風起雲飛歌有思

九日八時天暮望都城各門樓

百雉環城故國雄鳳樓晚日霽明虹逋臣廿載重歸
日無限傷心煙樹紅

十一夕出西直門至頤和園門外步月仰瞻璇
題蒼茫有感同行者善伯及雲門侍講

萬柳耗：御道長故宮門外月蒼涼逋臣重到腸堪

斷二十年前對御床

五月十三日出遊瞻宮闕謁文廟飲于萬牲園
與善伯同遊

六年四亂亦堪悲□□□萬物熙雞犬不驚金鼓
靜驅車九陌看□旗

十五日早望闕口占

五雲宮闕望觚棱黃瓦曛曠曉日昇竟見少康重纘

□躬逢光武再中□漢官重覩威儀盛□會親瞻□
□承逋播廿年重詣闕喜心翻倒淚沾膺

十八日南苑飛機隊潘世恩尉遲良以飛機投
炸彈於宮中斃三人宮廷大震醢王于十九
曉召入吾曾賞禁城二人肩輿不及候徒行
入東華門已閉久叩之守兵覘吾冠服乃應
門則殿廷闐然醢王命商外使相對慘悽外

使許保宮禁託澤公復命遂留使館

流涕□室遭艱難宮頂飛機幾次盤奉召趨朝不俟
駕臨危叩闕豈鳴鑾羣臣散走殿廷寂外使商量宮
禁安不意廿年歸國日龍樓鳳閣對汎瀾

二十夕入使館住美森院有老木步月口占

小院迴廊月色微森深喬木息塵機孤臣白髮明燈
下側望觚稜事已非

廿四日侵曉四時至下午二時砲聲不絕流彈
入別院巡廊搔首輒歸下帷校所刻成自著
之春秋筆削大義微言考

高木蟬鳴午苦暑圍城砲聲密如雨迴廊搔首步沉
吟下帷且校春秋注

張紹軒以六千之衆敵八萬之兵壯矣諸帥本
與紹軒徐州訂盟□□今竟妒功背盟無信

不立痛哉

圍城慘澹賭龍爭
蟬噪聲中聽砲聲
諸帥射王敢傳檄
羣僚賣友竟偪兵
晉陽與甲何名義
張東無謀名喪傾
信義云亡人道絕
旂收影涕沾纓

廿九日為□政府名捕吾又居首回首戊戌八月適廿年矣

解禁趨朝十日前刊章名捕復衰然黑雲壓日慘瞻

關白首迴天泣逝川
黨錮重悲鈎俊口陸沉再見毀
坤乾我生命豈在牛斗蒙難倉皇又廿年

館門深閉終日大雨無人吾是老僧入定矣

薜荔蒙牆樹蔽天
院門深閉颺茶烟
偶逢淫雨日昏
黑便是僧寮入定緣

善伯與我共難月餘君勉與我共患難廿年善
伯持歸示君勉吾輩既為救國而來萬千苦

難原是故入假使鐵輪頂上旋定慧圓明終
不失

哀我生民偶現身故來地獄不酸辛忍同雁鷺爭餘
食度世同來是化人

贈乙庵尚書四章

解帶論交三十年同舟郭李望如仙盡通文史儒玄
學證入慈悲喜捨禪莊惠相忘在濠濮馬龍無礙戲

人天無生已了得
大慧出世聊為入世緣

諸天出入四飛揚
國土熏聞想衆香
下界夢迴驚蟻
鬪宰官身現看鸞
翔哀民疾苦同
不忍憂國傾危共
救亡雪館雨窓頻
緯繡篝燈促膝幾
迴腸
海外分携十六年
五年黃浦慰纏綿
酒爐再展論文
詔文室重談品畫
禪大
革除救移國故
憂念力
迴天驅車北贊中
業留記春官未了緣

人言經國稱房杜我信同心比范韓
偌大乾坤偕負擔生平襟抱共艱難
鞠躬豈計遭蹉跌鈎黨何能害
錯槃上有皇天鑒忠悃祝公頤壽共彈冠

乙庵尚書避居吾羨森院半月于其行也賦此
以贈之

蘇李河梁携手時
范：大地欲安之
天人去住同旦
暮半月羨森留後思

久共蛩：與巨虛素心晨夕數居諸綠陰移影驪駒
駕從此蒼苔徑不除

丁巳七月七夕幽居美森院念滬上沁園故居
及諸姬與諸兒女吾以五月八日曉行今適
兩月殊覺良久蓋獨居熒寂之故未知何時
可同待月看花也

無垢亭橋宵待月 閱清院徑曉看花 三年池館共歌

哭兩月別離無口家碧落銀河苦風浪雲鬢香霧想
仙槎遙憐黃浦小兒女可惜燕雲解歎嗟

七月既望看月懷沁園

明：如月光可掇赤壁何時得縱遊記得去年同步
月繞廊深夜立橋頭

丁巳中秋後五日題所藏孝迪茶竹幽禽圖於
北京居幽之美森館所藏畫只此一卷

綠竹猗：猶挺節紅茶灼：自幽芳最憐十一共命
鳥棲宿一枝人世忘

其二

蘭蕙化茅刑天舞茶竹幽禽生意回綠陰晝靜美森
館盡日無人攤畫陪

公裕弟子吾蒙難日來省視奔走秋八南旋以
詩送之行

草堂都講王公裕雪白蘭薰唯汝賢思我廿年陳蔡
遊金臺蒙難日相憐

其二

黑雲漠漠欲蔽天秋水蕭蕭送客船南望茅山騎龍
去人間天上亦多緣

八月十三日祭六烈士於幽居之美森院廿年
還國再蒙大難酌酒哀痛

戊戌冤魂莫問天朝衣東市本吾先素琴顧索應今
日白首同歸歎逝川蘇武國門竟生入趙岐土室復
幽煎年：酹酒傷秋八蒙難重傷驚廿年

柴市慘痕未臨哭燕京正氣復居幽早憂王室銅駝
感已憶華亭唳鶴秋逮騎刊章再名捕閉城大索記
前遊君臣地下如相見代告崇陵渾泗流

亞蘧侍郎文見贈二詩並以五月廿三夜話詩

相示賦答

老鳳高飛么鳳清
中州天闕發靈英
亡韓尚有子房憤
復漢如聞周勃兵
再毀乾坤無有易
橫流滄海尚思平
西山口氣風雲鬱
臣靡猶聽鼙鼓聲

瑤臺夜語雨淋鈴
錦瑟初停聽砲聲
玉女投壺聊作博
金仙下淚太多情
家人筐篋載忠節
大陸龍蛇起甲兵
怕讀孤忠悲痛句
近看南北陣雲生

丁巳重九日美森院感賦

烟雨青黃院落陰滿庭風葉晝沉：東籬無菊惟黃
葉落木天高感客心

九月題袁督師祠二首

吾粵將才名世者督師祠墓酌殘紅古來才大原難
用朝末功高鮮令終間入長城君自壞讒多寃獄世
無窮國亡勿謂無人在長令傷心吊鬼雄

杜郵賜劍杖涼風馬草投潮藏種弓寬寫金陀莫須
有囚于鐘室將毋同搖落山河名將碧蕭條異代劫
灰紅記遊山海關憑弔立馬長城一世雄

門人張伯楨子幹為鄉先烈袁督師表彰達祠
供奉請詩以此貽之

先烈勤：表繡絲辦香持為督師祠白山黑水海翻
立鞞鼓聲中我有思

中秋北京城上步月

城頭馳道直如矢夾道林花紅翠寒玉殿瓊樓無限
影傷心隱：月中看

正陽毀斷尚岿巍步接崇文百雉遙城郭人民可非
是濛：烟月望深宵

坐几林中掃綠苔巡兵碧眼荷鎗來此何國土燕京
也壁壘今歸客館開

夜：城頭步月明，俛窺粉堞聽笳聲。
人家燈火十萬戶，朝市遷流感我生。

丁巳夏五六月間蒙難避地美森院即事

深傾張裕葡萄酒，移植豐臺芍藥花。
且擘蠓螯寫新句，已忘蒙難得蓮華。

庭蔭南柯方覺夢，几攤大藏讀楞伽。
吾生自有安心法，所遇皆欣即是家。

九月廿三日壽陳弼庵太保七十

樓閣清流文學宗黃襪晚著護桐宮巍然蓋學存元
老絕少書生兼總戎潞國格天期耆壽虞淵捧日鑿
孤忠我生兄事傷蒙難臣靡終歸矍鑠翁

壽沈濤園巡撫六十

海閩喬木鬱雲霞烏石重開旌節花循吏班春多治
譜詩人閱劫遂名家冬青南極萬年樹秋老東陵五

色瓜與子杖鄉祝靈壽重扶日月紅光華

九月為中國最傷痛日賦二章

秋風蕭撼吹落木夕照昏黃對晚天早慮分亡同印

度今真保護類朝鮮相持螞蟻資漁利深恐義軒絕

種傳勿謂無人謀不用側身天地淚如泉光緒壬寅
吾居印度

作政見書辛亥作救亡論共和政體論癸丑作
不忍雜誌以戒國人皆不聽有以致此

軍器同盟甘賣國利權同室日操戈四百兆民恐奴

隸五千年史帳山河國屯身播吾遭此瞎馬盲人行
若何胥溺飲狂猶作笑可憐召□為□□

謝芮恩施美公使

美館高柯庇我陰遮天蔽日暑難侵太平洋水深千
尺不及使君情惠深

子封布政兄自戊戌別丁巳再見則感刮萬端
日相慰藉臨別賦贈

卅年交蓋廿年別，劫後重逢白首新。
軾轍才名天下重，李桃芳蔭嶺南春。
鄰卜南村尋處士，詩從汐社訪遺民。
平生江海忠義動，再造乾坤共轉輪。

丁巳十月廿二夕，美使派文武吏士專車護送。
出京，鐵寶臣尚書、顧亞蘧侍郎、商雲汀侍講
即來慰問道謝，並呈

居然辛苦賊中來，又度重關亦險哉。
嚴警車亭游徼

密模糊夜月野天開國門生出誰能料城闕迴瞻亦
可哀兩度倉黃仍免難所親驚喜首頻回

使館重煩文武吏鋒車專發護逋臣電燈照耀穿中
路劍珮森嚴夾轉輪馬廠乍停夢驚砲天津邇止我
為人戊戌閉城停鐵道廿年回首重酸辛

神州臨晚重徘徊游戲人天一瞥回萬物入機劫終
壞衆生有病我仍來泥犁故入原無畏滄海橫流孰

挽回再毀乾坤思再造側身大地嘯雲雷

丁巳冬至日遊青島並謁恭邸於會泉

海上忽見神仙山金碧觀闕絢其間曉暎乍上映紫
瀾樓觀飛鷲抗晴巒崇樓尖塔五色宣晃耀眩目出
人寰六衢整潔樹列班萬貨殷闐弥百屢驅車周道
馬翩；逾山歷澗至會泉樓閣倚山臨海滄碧波浩
蕩通天邊登高嘯望心悠然樂土信美吾不存此吾

青島昔荒田粵昔丁酉德攘先吾時伏闕力爭焉大
陳利害言萬千投書宰相慘呼天常熟翁公憂國顛
早朝前夕稱荐賢遇臣百倍謬推尊一時輿論譁然
傳請破格用救元：退朝辱訪枉高軒時近冰河吾
言旋驪駒駕南海館門公遂直入吾齋前朝旭甫上
草樹妍披衣強起相周旋公強留行情意諳且言聖
心至勤：由是感激贊艱難上書變法百萬言請

效明治書拳：十四卷考條理繁聖上發憤百日新
萬國震動中華春惜哉蓋臣蕩北辰政變遯荒國步
艱至今日將墜虞淵共和六載大□瘡吾奮救之竟
蒙難展轉微行乘神丸忽睹青島愴我神日本立憲
上有君國本正定乃勤民百度並興模歐文于以用
武為國魂乃得此島興雨雲吾國共和□□民羣盜
攘權徒紛紜生民塗炭日遺屯試觀川粵湘黔滇同

室操戈日相煎豈有國利民福焉豈有民意與民權
大謾欺民內訌闐徒供漁人得利便山東日設民政
官我乃蔽目揜耳何可憐民力爭之未得直□□我
惻：痛難捐會泉山水最清妍前後櫻花為公園中
有賢王卧林樊憤為劉崇英氣完寔蹈東海首陽山
不食周粟踐周原見我如故意纏綿今日冬至逢良
辰京國舊俗陳餽飫吾為一飽相勞頻且將相宅擬

卜鄰夕陽漸下我歸船
回望孤嶼繡金銀
嗚呼感慨度天人

游大連旅順謁艾堂賢王賦呈

長白矗東北萬里走旅順
陟入黃海崖鐵山雄作鎮
百島走碣石起接登萊近
口我兩京地天險守岩峻
俄規東亞霸周鼎竟敢問
魯久為齊弱后淫不自振
無端甘割地虎牢遂屬晉
早知大禍臨冠劍皆齒震

吾時初釋褐痛哭上書訊聖主力持之早朝后理鬢
怒以梳擲上謂汝何忿：豈真欲戰耶垂簾含餘愠
遂并大連城割讓不血刃俄人經營之大起宏規運
盧卜一萬：岩疆險以迅我：鷄冠山地六曲成陣
唐：闢大連道廣宮室進大厦築萬間雕牆過數仞
徒觀其氣象鉅麗壓百郡東人惡榻斲憤奪發大願
桓：乃木君忠孝東國傷破險奪崑崙武稜乃大奮

東鄉亦健者俄艦焚餘燼吾昔觀影畫海波有餘炊
驅車登高岡覽彼戰利品感慨為流涕信美天何慙
紫瀾迴內灣公園亦有韻大中小各校宏麗氣殷賑
環山度阡陌霏白雪填口嗟我為荒壤授人作雄郡
撫軒但太息對酒不能醕賢王此避地相見話舊讐
忼慨猶當年勤孝感令聞才子廿二繁掌珠十六潤
無國幸有家玉樹滿庭搢王子勞遠送願言效忠信

天心必回復幸王加餐飯

龍洞

亂山走迴合群峭重杳複丹崖與翠嶂壁立削碧玉
溪楓欲染崖巖柏倒挂綠澗流夾松風謾似和筑
我：禹登山竅：藏龍谷錦屏芙蓉開列岫三秀郁
如環玦口擘如城墻堞矗圓峯卓筆立絕頂抗塔獨
二甕不可見嶽竒登層麓及腰洞露穴入門僧秉燭

三佛儼像設迎立妙嚴肅侍者凡六人寫生肖瞻矚
不知何代刻疑化工所劖自此蜿蜒行低頭恐石觸
高穹忽峻拔遠徑且匍匐行：皆圈豚步：慮傾覆
上懼折元首下憂濡溺足百步露線光狂喜慶出谷
翻嫌遊興淺更欲重躑躅洞口過懸崖半广可坐讀
入定游諸天三界忘色欲石磴澤盈丈少憩樹籟：
元豐有刻文記為求雨祝俛視環立壁天洞地亦福

側徑下聲确度澗越紆曲下有聖壽寺唐栢蔭茅屋
把酒仰青天騎龍馴白鹿

佛峪

路迴而峯轉數里見佛峪山掩重肺腑宇張鬱林木
迴環成洞府窅窅闢壑谷广石蔭蘭若長廊俛崖曲
倚闌坐酌茗周瞰山水淥澗流聽潺湲森綠凝萬木
右轉登靈臺飄：凌雲矚天生一片石百尺矗心目

輒于松柏杪手攬飛雲竅下俛林汲泉上有怒飛瀑
靈風吹潮音散沫下珠玉齒：漱白石洗心可呷裸
羣賢樂俊游晞髮盪涼沐幽奧非人境清涼出林屋
此是帝釋巖超觀世寵辱忽遊播耨迦頗覺天地局
南北龍玄黃雷驚鬼夜哭銜杯愴然忘筍將醉歸僕
碣石四百島渡海起泰岱走峯盡濟南龍種猶存在

新濟南詩

揭：華不注離：點蒼黛翠巘嶸天半單椒無連帶
虎牙獨雄立巨石奮靈怪鵲山按前橫萼藥鞍後拜
群山次第朝黃河曲擁戴名泉七十二衆流會灌溉
明湖滙濟灤歸極環下界清河繞黃臺紆折入河內
鵲湖懷家窪千里水朝外山水有拱抱卜宅此為最
我儀地形佳冠行省都會昔人昧形勢河水夾反背
宜移新濟南華山下作繪大開數馳道公館聚冠蓋

山上擬亭臺夾道植松檜
巖舍先移築僦：曹子戒
游徵警長途車馬分馳載
居行游皆來盛會於此賽
人皆羨樂土十年繁茂對
今日攀巉崖翠確我僕僊
它時成大邑四顧意氣快

蒼苔蒙以情
 樹蔽天
 院門深閉
 踏茶烟
 偶逢佳雨日
 昏黑便
 走僧寮入定
 政
 休門
 休日
 大雨
 無人
 吾是
 老僧
 入定
 矣

哀哉生民偶現身如來
地獄以酸辛忍回雁
鴛鴦爭鋒念度世因來
之化人

善伯与我共結日緣
君勉与我共乘難也


年善的材級 示
君勉可舉 既為救國而
來 萬千 善難不是放
入 便使鐵輪 頂上旋定
蒸 團 飲 供 不 火

二月十二日 寫近訪付

善伯收呈

雪庵弟

游存父



寥天蒼

立一天山家方處可
撰全西湖遠矣亦悔

一天山頂作可蒼呼吸

參寥雲西開三石山

環三面以芳枝松栝秀
枝梅吐香日月南宮心
起域烟嵐東海來腹

坦西游杭羨戶玄夫
登望奧憇哉

清巖

立開天天宮前橫
廿丈天然岩回煙孤
藤蘿山奧也

枕爲山株俛石屏屏
橫廿丈杪青二山圍岩
壑官奧境上極藤

蘿不換名芳草生
環石徑小池噴香
茅亭玉皇山影雷

峰嶺寫入蘇堤烟
如船

康游存史

壬戌秋寫

此詩第付回薇

更姓



金石琅。玉元美。國
世翻。懋。氣。却
故。我。壽。大。史。立
故。人。懋。死。
辟。齊。粉。稻。素。
名。如。人。保。也。素。
播。德。誠。推。如。和。且。官。上。元。元。
狗。國。

游存廬詩集

康南海先生詩集卷之十五

後學崔斯哲卓吾手寫

辛酉元日賦詩二章呈寐叟

今為六十四遺民歷試諸艱賸此身國會大同幸親
見天心來復望誰新息壤空懷撥亂世望樹仍思轉
法輪千百水仙香滿室坐忘春色已還人

辛酉七月祝徐君勉五十壽

金精正芒寒本自皎摩發獨立放光明照耀爭白日
吾徒徐君勉清淨瑩冰雪華岳見秋隼爽緊動毫髮
泰山矗雲端正色壁積鐵天生青雲器惡濁掃一切
唯有救國心畢生腸內熱金城植惠本閱徧萬千劫
靈山夙世會與吾億生結發願來人間欲將亂世撥
神勇震雷霆大仁本惻怛冠歲來問學大義獨貫徹
英才羣偕來深叢拔羆突吾時發大同散財養俊達

卓犖博群書敏銳通儒術駿馬騫坡澗竒思騰文筆
草堂充都講門人咸敬悅吾開強學會留後支隍祀
會散改時報雄文任撰述大聲談國事震動起聾瞎
吾憂下無學創校在東國大同開學舍橫濱聳屹
君往充校長學子萃：茁九畹馨蘭蕙廿載綿瓜瓞
後卒業大學數百爛霞蔚從政徧中外至今思棠友
友交東國賢才名結僑肝犬養君稱子德行為第一

信哉得其真聲聞不可遏戊戌吾聞政欲君持東節
幽都日忽冥黨禍發倉卒英艦救至滬蹈海欲永訣
吾老母在堂思家心痛割以君忠義資貽書相付託
絕命永訣書天下今傳說株連至十族捕逮汝幸脫
□□與憲政開會百國訖惟君徧呼號美亞重蘭恤
山海度蒼茫廿萬里播越忠信涉洪濤公廉動萬物
毀家紓患難冒險載飢渴平恕待僑民赤心收豪猾

四洲兆華僑惟君能提挈咸為至誠感非徒辨才折
庚子吾勤王君大收豪傑並轡唐才常緯繡籌密勿
歷載備險艱大事痛蹉跌雄心益發憤奔走再厲揭
南渡星架坡深入暹羅窟東越太平洋美墨周車轍
徧開數報館大掉廣長舌民智雖日開國變竟擊裂
大盜遂移國哀激憂孑桀授君總領事封還官誥笏
日夜收將士勃率弥百粵吾亦捨宅助犒師遂鯨突

橫海跨樓船，駕浪羊城伐。海珠詭和會，伏兵遺羅罽。
鎗聲逆雷震，伏地積尸壓。皇天祐仁人，電船來救出。
勞病垂累年，肝肺傷成疾。險死喜更生，得天竟逢吉。
時機豈患無，養生宜勿失。君今五十歲，十四月當七。
梁鴻與孟光，齊眉壽霸匹。才子能亢宗，兩孫知覓粟。
人生嗟寔難，大亂慘流血。歐戰與吾草，帝王同慘殺。
無貴賤，賢愚蟲沙皆斷刮。吾与汝多難，死生同契濶。

今俛仰無恙且能祝哽咽相顧應喜樂飲酒聽鳴瑟
雖憂中國危每念心怵：宜觀有生樂神明自超逸
再祝六十時引髯吾醉兀諸天無量數御風游傳駟
騰雲駕紫蜺揮手挽日月俛視地如橙不足當一瞥
報子以神方贈子以玉瑟試開天中天長生有霧佯
度劫億萬歲無灾永除袂神珠定且明天龍弄一鉢
微壁二女久別以母張氏夫人逝世來滬奔喪

送葬於茅山事訖分散以七月十八日同行
會少離多又有家國存亡之感老夫雖有天
游之學亦復悽黯不可為懷同遊半淞園拓
影得詩四章送之

十五年前瑞典湖團團蓋夢久模糊黯然况復經多
難耄矣能無傷老夫後會扶携定何日新園拓影且
留圖人天聚散知難免骨肉分離最可吁

若論汝母同相見已在阿微新嫁時
抱孫已過九子母廢帝將興八國師
似歷千年游萬里竟成死別又
生離淒涼廿四年中事國破家亡不可思

女來萬里只汎瀾汝母容音已閉棺
歌浦杯棹皆罷飲茅山風雨共飛翻
頻來讀書不能得此別遊園強
作懽我本諸天自超度死生契濶感盤桓

戊戌當年逮捕挐天乎姊妹幸生逃
覆巢破卵原同

難持節環球聊自娛世亂帝王亦難免人生憂患本
來俱婆伽婆為破煩惱長記天游天作徒

壬戌之秋七月十七日餞同薇同璧二女酒後
步月薇璧問易義並及人天之故明日行無
人間悲感之情庶幾遊於人間而不為人世
所囿則超然自在矣

行時問易說經銓不似凡人傷別筵記取天遊臺上

月伏生有女出人天

五月九日自曲阜到泰山居斗母宮對面盤龍
山即吾地十一畝有老栢八十五株下為白
澗流白石鑿：泉聲潺：坐栢下石山終日
聞泉聲將營室焉

徂徠前對汶滂橫上倚巖：室可營八十三株存老
栢澗流白石聽泉聲

買山泰岱亦前因，八載初來為主人。
松柏滿山泉石繞，欲營石室老吾身。

題紹越千先德夢迹圖

太乙乘蓮藜，照之循聲文采著。
褰帷因緣一切如夢迹，圖畫長留絕妙詞。

壬戌九月二十八日，夏映广陶叔惠陳哲侯三
廳長，招同喻澹寧編修、王省三、交涉使楊見

心中書游西溪飲于秋雪六樓上觀蘆花洲
渚皆白如雪光景佳絕歸舟聯句記之

蘆花瑟々滿洲白銜飛花欲吞雲夢澤映湖山山外

覓清游省秋老西溪天水色扁舟有約南海座惠叻

陪杖履賞秋雪哲渺々涼風起天末澹遙望一片雪

花出省一杯在手興欲狂古今詠者天涯客酒酣扶

醉登高樓飄々柳絮入茵席白頭老人岸巾幘坐對

此花長太息廿年夢憶陶然亭風景淒涼似京國追
思舊夢蘆中人風波幾變天地裂休論往事作天游
斜照晚澄歸槳拍注

西湖水上步沈寐翁尚書兄却寄

烟深不見北高峯獨泛扁舟寫舊踪可惜寐翁不携
手錢江風雨見魚龍

杭州西湖一天山人天廬成賦詩付同薇女

劫是莊嚴或是賢飛灰未盡我生年人間日暮知何
世山上雲荒別有天子處幽篁冥晝雨坐觀滄海與
桑田故鄉無此湖山好避地人言望似仙

壽王公裕

公裕學道人秀骨本玉屑積刳修德本熏香不能滅
與吾靈山會舊因知幾結通經而學古金鐸諧玉節
溫潤縝以密蒼粟以皎潔吾謬憂國高留京當戊戌

草堂存萬木都講唯汝述鏗：高說經學子咸服悅
及吾遺罪難學舍亦封沒藏書三百篋秦焚何烈：
株連至十族捕逮汝僅脫國門猶懸賞舉家累汝挈
遷居馬交石十年避縲紲惟汝有賢父懽然治井滌
鈔我中庸注不以黨禍觖世德能作求寒暑無冷熱
吾家走海外港澳匿偷活惟汝奔走視廿年遼歲月
始終如一日死生同契濶庚子京邑墟乘輿驚播越

吾舉兵勤王惟汝總樞揭關中託蕭何籌餉收豪傑
手挈百萬金公廉而高潔自奉最儉嗇仇怨無可說
旁搜及綠林此輩多反側駕馭苦艱難日對嘔心血
支拄既歷年謗議尚入骨唯吾知汝賢匪躬當惶既
大事雖不成元亨翳彷彿蕭然重相見清白如浴雪
共事輒成仇惟汝弥親熱自是超世心道高出曩哲
丁巳吾邁難幽憂美館歇吾子愈恤蓋奔問來蹙躡

日夕至勤苦半歲久不輟傳書商國事送吾出虎穴
從容樸被行然後徐歸粵知時無可為與世乃謝絕
貽書勤勸吾謂盡力事國今既聽藐亦可止憂
仁者固必壽况汝道高徹今歲杖鄉飲長眉齒未豁
令妻同長年靜者宜大耄憾未啣白杯寄此祝黃髮
諸天無量數同御風車徹揮手紫霄上出入日與月
俛視地球小不足當蟻蛭化人通天人隨喜弄龍鉢

一飲紫霞露億萬歲如沫

一天園詩十章

園在杭州西湖一天山有丁家居山下故俗
名丁家山今丁家人盡矣故復名一天山園
地購於丙辰丁巳以十一次成今園凡三十
餘畝以庚申春夏經始屋亭道路壬戌賦成
一天山裏一天園地傍西湖負郭村邱壑自專吾可

老湖山高卧我無言閉門菜甲漸成圃避地桃花亦
有源拄杖徜徉成日涉神游天外此身存

桃花源

三面湖波亦半島百株桃樹又漁舟蓬萊婀娜宜忘
世湖水漣漪渺隔洲夾路荷塘白烟影小亭篁竹綠
雲秋花開花落春何意避地避人天與游

人天廬

天上人間七往還而今游戲在人間
民生同患何忍去木石與居猶自頑
茅舍槿籬盤磴道茂林修竹抗
崇山結廬人境心仍遠呼吸通天開九關

筠岫亭

余處幽篁不見天登山險難磴迴旋
高邱萬竹隔雲雨峭壁一亭通
月烟緩步躋攀緣樹杪扶筇曲折出
崖巔豁然別自開天地盡攬西湖山與川

寥天臺

一天山頂作高臺
呼吸參寥雲四開
三面山環三面
水萬枝松擁萬枝
梅吐吞日月南亭下
起滅烟嵐東
海來腹坦西湖抗
萬戶老夫登望興悠哉

開天天室

高齋高抗一天山
岩壑橫臨屋四間
前作長廊花樹
亞後憑絕壁水波環
窗中列岫排青入
座上來雲虛

白閒想入諸天化人也時從碧落數螺鬢

水精域

廿二玻窗三面成
俛臨絕壁倚天清
水晶宮裏生虛白
晃晃是天中
放大明葛嶺
抹煙屢影淡蘇堤
過艇月華生
朝暉暮靄通雲日
春煦秋陰受雨晴

潛巖

抗屋山椒俛石屏
橫廿丈樹青
下開岩壑窅窅

境上絡藤蘿不識名芳草成茵環石徑小池噴水傍
茅亭玉皇山影雷峰塔瀉入蘇堤烟水舫

松雲徑至飲淥亭

一天山突出西湖三面環湖烟水殊半島卧波俛蕉
石蘇堤如帶拱吾廬百松夾徑垂：下萬木漫山處
處腴日吸山光飲湖淥石壇啜茗亦堪娛

山林小築觀天性鶯鳴比鄰近物情魚躍鳶飛參道

妙菊芳蘭秀識時行山邊射虎看人猛湖上騎驢觀
我生拄杖雲中日成趣盪舟烟外月微明

十月初四日陳哲侯陶叔惠夏劍丞三廳長招
遊西溪飲秋雪軒蘆花滿洲如雪光景佳絕
宴後移舟交蘆广題詩

不到交蘆又七年舊時題墨化雲煙秋來何處一片
雪記取西溪洲渚邊

秋雪菴中蔬筍筵移舟聯句共羣賢風流猶憶□□
□付與山僧秋雪篇

十月十五携鶴姬游三潭印月步月

湖中島嶼盪漣漪山作園牆湖作池步盡長橋三十
折八年来看月明時

壬戌十月十三日□□□□□盛典微臣因事
不能趨朝叩賀湖山綿蕞為儀望闕行禮聞

十五日朝賀各國公使咸入宮上能操英語
酬答各公使咸大悅歸心民國大僚亦多入
賀者喜極而賦

龍潛閭闔五雲開五鳳樓前鳳輦催萬國衣冠瞻玉
步九天日月耀金台乾坤北極居懸口袍笏東華入
杖來青鎖朝班嗟未點湖山高處望徘徊

吾西湖一天園泊舟處曰桃花源

桃花園裏百桃花打槩歸來笑暮霞
白首老人看花醉花開花落
在誰家

曼宣子女在游存廬看花樂甚

游存廬中飛杏開幼子童孫喜欲狂
打罷秋千賞花去忽憶燕京花
廠香

花朝日校詩一天園山巔飛花盛
開書來方記今日是花朝
寫以為詩寄曼宣壻並示子良

瘦公數庵三子

莢花爛熳滿山椒
白舫如鳥散六橋
盡日扶筇看山水
書來方記是花朝

為校新詩一天園
白頭花下啜茗看
遙想花之崇效寺
海棠開後酒杯殘

鄧鐵香鴻臚手書詩多至百數十章及其愛女甫蓮墓誌流傳人手為索還之元翊弟

直節高文世共知
死生契濶盡交期
遺子來遊□□
蘓摩挲遺墨淚雙垂

詩句畱存絕世芬
傷心最是女□文
亡書三篋今來
復代贖文姬返與君

壽季容譚氏四妹六十

骨肉同枝葉託體自雙親
兄弟凡五六今餘我二人
鍾離嗟妹在大雷寄書頻
垂白徒相望緬邈隔海雲

妹今六十一幸聞強精神夫壻富且壽子女多成群
一生健飲啖八孫抱紛紜宗戒有所事奉教惟所云
惟以老舅在未肯俯觴尊恒言不佞老戚黨咸羨欣
人生與憂來如妹已寡聞天錫福嘏純德昌延後孫
寡况六十六共享百年春七年不得見何時酒杯溫
宜來一天園西湖同樂存

賀吳昌碩八十

篆刻高名海外知
雞林製像更求詩
誰知詩字皆忠憤
錯被人呼作畫師

淵明曾現宰官身
垂老歸來作逸民
從古畫人多大耄
大癡長壽自長春

壬戌十月十三日恭逢□□□□大婚慶典微
臣蒙賞給御書天游堂匾額又御書福壽字
各一方感恩賦詩恭紀

狄臣無地可埋憂且作諸天汗漫遊想入三千周世
界身存七尺魄神州乾坤日月懸雙照鸞鳳神仙下
十洲更効馳驅同建□永懷他日答宸旒

題石門銘

北碑終是王家好王遠書銘在石門鳳翥鸞翔仙衆
會花濃雪聚佛微言瓌姿異態自竒逸隸韻草情得
妙玄右挈龍顏左瘞鶴追隨羲猷探南元

四月五日晨起移石十二于松廊夾立石道旁
頗瘦透高皆數尺

山曉茲無事呼僮擁石排丈人顛米老仙杖列蕭齋
夾道立松籜分班侍石街老夫自娛悅此十二金釵
龍井僧送黑竹四株至異品未之見也分植山
巔路旁

龍井有烏竹僧來送四株分方立中土微雨種當塗

與可曾洗墨東坡寫作模黑龍嘯雲雨入夜震西湖
夏劍丞胡悖仲陶叔惠徐肖硯同約泛舟西湖
看雪過訪吾丁家山人天廬踏雪下山尋蕉
石鳴琴飲於樓外樓登西冷印社觀樂樓聯
句

登高一覽湖山白姓如對畫圖鋪水墨惠王戲咳唾
自九天劍玉龍百萬□□絕悖軒豁晴昊見花埤肖

遠山近水雪冥兀 姓扁舟共訪德公居 惠松竹皓然
歲寒傑劍精廬近 俯蕉石巔 惜列岫旁搜葛嶺北 肖
白銀世界可有無 姓華嚴忽現未曾得 惠道旋苔磴
足碾瓊劍履穿雪林 眼生纈 惜山下欲聽太古琴 肖
雪冷滑誤致客跌 姓孤山酒樓春酒香 惠義尊合為
老坡設劍銜杯萬感話前塵 惜滄海桑田那可說 肖
樂夫天命逍遙遊 姓觀樂樓頭忘主客 惠皓々陵谷

斜陽多劍凍省潛柯舊巢拙
悟野煙斷續橫翠微肖
多謝故人訪臘日
姓蒼：暮靄增嚴寒
惠春色却還
花開陌兩高頭白峯插雲
惜鳳林踵促歸舟發肖

癸亥二月住海門舟中

海上神山縹緲中
花朝重到御天風
青：島嶼雲在下
浩：潮音浪往東
清淨壑岩來佛土
參差樓閣盡
梵宮不登彼岸休
怡悵逝水傷懷住
壞空

賀余堯衢通副

梁孟當年挽鹿車，
寧惟金石共編書。
古來稀有能偕
老，玉樹滿階誰得如。

西湖雜詠

昨日扁舟放西湖，
一抹橫山瀉青綠。
今朝登樓望西
湖，羣山一夕換白玉。
龍百萬戰修羅，
敗鱗跳躍飛相屬。
天時人事固多變，
皓：高陵與修谷白銀世界。

現突兀琉璃天中來寄宿

雨夜宿白雲觀竟夕聞泉聲

白雲峯下松青：白雲觀路綠陰冥白雲上天化成
雨竟夕風泉滿枕聽

華陽洞口碧桃熟霞飛海上暮山青壞瓦頽垣夕陽
落朝天壇上且談經

久作神仙化鶴歸人民城郭是耶非吾生今亦感桑

海徙倚丁岩對落暉

連峯尚有鷖輪迹丹井難尋抱朴菴欲問昭明讀書處捫霞磴道盡山嵐

石山聳秀奮巒口道祖峯頭接上元占飲青山萬松碧吾行種口徧西園

飛來石果自何來上下有縫誰斷開獨立嵯峨積金頂俛看人世徧塵埃

碧玉池邊碧玉祠
山顛祀帝欲通天
夔龍未欲乘龍去
竒石如林宜上仙

哭沈寐叟尚書

黃亭丹旆駐江干
四海弥天七尺棺
莊惠談辭從此已
牙期琴調不須彈
平生空復思風義
國事誰同籌險口
花雪打船嗚咽水
人天揮涕淚難乾

哭寐叟四兄尚書哀詞

浙水涌洪灾龍蛇遺竒厄哲人嘆竟萎有識咸歎詫
三十五年交於我尤心惻罷宴制服哭天風號悽急
先生天人姿神鋒照太白無量世劫來夙已植功德
高僧歷幾生閻浮偶來客示現士夫身吉祥生虛白
位業本真靈大慧自在得衣鉢過來人獅吼慣棒喝
樓閣現華嚴淨穢土不擇油：與人偕清任乃獨絕
百學窮其源九流攬其別博聞而強記鐘扣必應節

北江文雅麗樊榭詩奧潔餘事作書家蹠蹠揚風轍
蘇黃應遜謝鄧張同撇裂冠歲攝高第郎官屈伏櫪
一麾守南昌遺愛匡廬碧提學而布政徽皖班春色
知才不大用頗為南皮惜開府達弘猷嗟哉不兩月
北朝道失綱國政日批僻疆吏以賄進大賢遭棄擲
挂冠拂神武坐視天日黑玉步改舊章孤忠自憫默
杜鵑泣望帝血淚歇浦側吾壯遊京華遇黃仲弢家

珠巢遂相訪抵掌高雲拏人天窮混茫文學辨杪差
翰墨反攻守莊惠時調誇相與憂國危深宵同歎呀
戊子初上書變法樹齒牙先生助相之舉國大驚譁
怙傳下刑部紛來求釁瑕君力勸括囊金石窮幽遐
公車吾再來論文縱天葩乙未割遼臺力爭漁陽槎
復爭割旅大鼓翼式民訛創會開強學大道騁驂駟
一一與公謀宵：相鈞爬丁酉公喪母金臺吾走驟

甲公之孤艱憂國之薦瘥是時德攘膠國人噤不訶
公力勸吾言再下馮婦車萬言書既上請師曰法俄
德宗大感奮雷動揮天戈維新救中國掃蕩舊向科
公又貽短書半簡字無多唐順宗實錄請吾讀一過
蓋公料事變憂我蒙網羅我竟邁大難海外跨龜鼉
別公十六年危亭尚風波癸丑重握手黃浦客禮渣
昔者相對憂恐國步蹉跎今者相對泣見荆棘銅駝

公勸留滬居國事得切磋巨君謀帝制假堯衣帝位
與公謀覆之日夕同畫沙偕公被密捕頭顱巨萬賒
竟能夷大盜久已備刀鞞覆衣既慘淡結張乃協和
摩燕鳥集闕復□黃髮皤夔典樂教胄卿雲爛暮霞
良謀未見聽一敗為蟲沙勿謂秦無人豎子奈爾何
吾避戴南冠公歸老東坡從茲號寐叟猶為醒時歌
賣文活生計鬻字相觀摩解脫無染捨堅白聽涅磨

吾好說諸相相見笑羲娥化人託曼殊歸心婆迦婆
或入播耨迦或遊難圃那袁安念王室流渾仍滂沱
七十能偕老年來苦病魔九月：將望西湖吾載過
前夕視君疾神明談婆娑豈意成永訣長隔安樂窩
埋此大圓鏡七尺棺空搓悼碩學孤忠睿題深歎嗟
賜葬金二千哀卹恩優嘉追思數十年謀國對山河
吾若喪手足天呪豈有加銀河傾為淚哀：惻暮笳

此豈為吾私殄瘁邦國瘵

輓張子晉同年

宰官現卅載政化記班春易學有遺說墨家存宿因
衆仙大羅夢兩度汴梁塵酒話猶如昨驚傷隔世人

中茅

龍池瀾茗壽泉家百里山川俛晚霞欲覓陶公眠醉
石玉門何處問丹砂

洞天百里入華陽窮探地肺訪仙鄉可憐金籙拔龍
簡誰得朝真謁上皇

句曲最佳金籙山玄妙受籙有遺壇九層臺上上清
處玉宇蕭條高且寒

天外三茅騰蹕來鬱岡菑萃愧仙才靈山長被隱居
占木筆猶同真誥開

採藥橫過紅碧澗排雲但見金銀臺三層高閣吾來

卧日聽松濤忘世哉

宿茅山之鬱岡陶隱居松風閣

早挂衣冠神武回避梁不仕隱居來山中若尚儻梁
相貞白先生汚甚哉

瞿文慎公哀詞

淨土熏修者重來是我生長齋屏葷肉無難到公卿
房瑄稱名德楊彪耻墜聲一生惟謹慎哀謚是真評

公路曾同相鋤奸奮至忠不成歎天命歸去泣蒼穹
大盜傷移口孤臣自匪躬痛心杜鵑血灑徧滿江紅
謬承推國士欲以救時艱三薦天難問廿年人乃還
綢繆詩酒會省識畫圖間湘沅流難歇無言竹已斑
敬題瞿文慎公像
清癯風骨過來人巖電光芒爛有神風度樓前頻仰
望長沙如見曲江春

十年黃閣事艱關去佞之難過拔山若使効袁功得
就豈看龍劫血斑：

三犯龍鱗敢舉仇愛才愛國有深憂頻年綠野陪談
讌遺像清高感未酬

西狩後壬癸間公三舉鄙人觸
后怒謂公舉其仇幾不測

白葭居士屬題精忠柏斷片圖

世道交相喪萬方同一貫偷生事仇敵精忠反見訕
氣節掃地盡豈有表忠觀片松同鐵石昔殉武穆難

不枯亦不榮
天壤垂異撰
富貴皆臭腐
此木不朽爛
長照西湖濱
南枝同讚歎
嗟爾檜媚仇
跪像千秋扮
觀此柏盡節
題詠萬年看

題余穉花鳥圖寄同徵

幽蘭寫向水仙叢
片石如雲苔點濃
不識何時供奉
畫黃鸝花上唱
東風

無題

萬木森：磴道迴桂花影裏記徘徊然燈列佛笑迎
我似為破煩招隱來

贈張伯英

叠嶂危崖在目前烟霞三日似登仙已忘鐵索登臨
苦但欲騎龍上碧天
岑堯羊角倚坡陀滾：黃河舟楫遇秋色危城蒼翠
滿居然表裏壯山河

太行山勢轟岩堯俯攬河流萬里遙
岳色河聲得雄壯
峭函關令厚相招

山為城郭倚池臺
萬里黃河槎艤回
北望太行雄巖
嶺河聲岳色日飛來

贈朗夫

回天力已痛無成
十族株連汝險驚
張祿變名出關
去趙岐誰保入山
行數年無信疑
汝死一月銜杯喜

共生老客諸侯居北曲喜逢嚴武舊同盟

龐公能以目代耳居德淳和物不櫻翠竹青桐階下
立瑤環瑜珥眼前明不憂不懼樂天性全受全歸觀
我生安樂空中入非想天游光裏聽天聲

贈張扶萬陝西人

講學追思戊戌年黨鈞十族忍株連紅劫久經沒桑
海青山同夢見神仙新知舊學思傳鉢周道唐京嘆

逝川弥月勞君勤立雪深霄與我共游天

興善寺勝寶泉泉甚佳色極潔有僧印潭寫玄
秘塔極清勁印潭四川人卒於光緒十五年
禪行清高

山半臨流勝寶泉寺能淨潔水能清印潭衣鉢有文
行書寫誠懸最渾堅

竹林寺五福間有古槐大數抱高十餘丈必唐

前物比泰山唐槐尤大

竹林寺上古槐樹：身兩抱上參天飛燕玉環蓋摩
撫美人黃土幾千年

火龍洞

火龍洞石最雄奇數丈高臨萬壑卑無數樓臺殿峰
頂上環峭壁萬松枝

紫竹林

群峭環屏松滿巔
僂看衆嶺現秦川
此是終南峯頂
寺水嵐山翠豁晴天

紫竹林後再上二里為興隆寺甚高上為四天門

萬木蒼崖落葉多
四天門上壁嵯峨
百盤磴道千餘級
紫竹深處鸞鳳和

絕頂雙峰峭壁懸
翠崖丹磴萬松喧
下臨茅庵真面

壁爭先一覺法方圓

終南絕頂圓光寺五頂羣巒亦五台
俛瞰漢城八川
走背看秦嶺萬山堆

月明太白連峯出雲接崑崙太寨回
最是雪峯：頂
白萬松天籟跨鸞回

遊山

崑崙雲氣接蒼茫星宿海頭起隴岡
中走太白鬱穹

蒼面對終南開明堂龍吟回頭成帝鄉南山插天何
雄哉峯巒五頂亦五台樓閣高下壓崔嵬沿崖四十
八寺觀排雲但見金銀瓏五度天門羣峯上樓閣華
嚴屬相望溪迴松風水潺：蒼鼠竄瓦墜碧鬢此是
漢唐離宮與別館抗山常傍南山間五步一樓十步
一閣阿房宮殿至此聲漢武長楊與五柞上林作苑
囿南山當時馳道時來還至今御宿近樊川霓旌避

暑頻行幸排雲但見金露盤
鐘鼓不移帷帳具飛燕
玉環梳洗處只今為四十八
寺禪寂朝香游憇住回
生大頂一何許

昨宵望月高卧

萬松鬱鬱蔽諸峯
落葉滿磴撥雲霧
天半真人不可攀
但聽溪泉出山去

內子張夫人大祥忌日欲草銘墓文未得泫然

思舊得詩二首

夢斷魂銷又兩年
茅山元祚託荒阡
追思香港倚樓日
蒙難糟糠只泫然

欲為表墓魏城君
舊事哀思入斷魂
酹酒行文猶未得
左家嬌女告阿芬

遊陝西登太行山感賦

陝城形勢天下雄
河流滾滾與天通
魏樓翼翼峯函

關時有舟楫泛其中北望太行勢崇隆千里疊巘望
不窮九秋萬里起長風城頭蒼翠極太空縣衙池沼
倚高墉河聲岳色自雄濛朝暉夕靄應接同老夫七
十意興濃東望崤函漢關封西顧桃林秦塞空喟嘆
河山心有忡

遊陝西紀盛

騎士四十先騰驤累百步卒背荷鎗將校戎服劍佩

鏘官士生徒郊迎將笳鼓震地旌旗揚燦爛彩棚燈
燦煌夾道聚觀如堵墻整肅不譁靜以翔長途數里
士女昌屏氣無聲立相望皆若銜枚登戰場敬若神
明共祈禳傳呼聖人何以當謬竊虛譽悚恧惶入止
學校登黉堂懸旗置酒樂未央弘農古澗牧馬場桃
林放牛田可疆棉花滿野棗林香惜經亂後生計荒
去年城破驚慘口搜括千萬滋吾傷萬民飢溺何以

慰吁嗟物質宜改良

癸亥三月十四遊河南開封禹王臺

萬里河流儗碧蕪芒碣雲去不能呼
吹臺高處遠觀集授簡而今感大夫

三月既望為梁欽侯左丞題吳子玉將軍畫竹
示善伯

參：伍：自成行疏密安排費較量
上將揮耒有神

筆似聞風雨戰瀟湘

三月望日遊開封龍亭

遠觀高寒俛汴州繁臺鐵塔與雲浮萬家無樹無宮
闕但見黃河滾：流

題吳王帥畫竹示善伯

風枝雨葉最離披風雨交加臨野池願報平安天與
壽青：永保歲寒姿

癸亥三月同年張省長鳴岐邀張督理子衡餞
于古吹臺賦詩以報之

將軍勒馬出郊關前車百騎走材官植暮都廬夾道
濱馬蹄沓；揚飛塵省長同乘度城闈吏民環堵塞
衢觀遠上吹臺餞行人灑掃檜柏陳花薰將軍先候
立於門登高萬里來風雲芒碭雲去不可聞大呼極
目雁鷺群桑柘欲雨陰靄紛同遊農圃覽耕耘短槐

高柳綠皆新長沼圓亭澤似春碑前拓影留後因鸚
鵡解語花馥芬松下行厨洗玉盤花邊班劍酌衢尊
酒酣揮毫感殷勤歸視山河日未曛

三月三十日遊南京清涼山偕同年陳敬原聯

句

清涼山色在夢寐性夢罇一逢携雨至敬散原老人
霜鶴姿高卧金陵賢避世去歲古稀行地仙我約遊

後視哽噎姓曾寵名篇獎衰朽更共雄談豁蒙翳散
冒雨同登掃葉樓湖山萬綠醉春氣姓明滅湖水城
郭外參差雁影烟霧際散山樓粉堞隔晚靄茂林修
竹臨水淡姓飛落鐘聲欄楯前僧飯不辨南朝寺散三
山冥濛落天外莫愁柳波猶烟媚姓吾儕間行作閒
客睥睨萬古為灑涕散長江不見無南北龍盤虎據
亦何意姓塵埋宮闕賸花區席卷英豪但酣睡散偉

人喋血苦生民霸王高視嘆兒戲尚賴霖雨洗甲兵
還我江山嚴淨地姓危樓暫倚銷百憂坐看暝色翻
寒吹散清涼本在阿耨上雪山冷侵無人跂與君天游
阿耨邊再得逡遊詩作記姓

訪梁文忠廬酌酒其墓感賦

種樹廬園曾寄來酒澆坏土我心哀摩娑羣木忠魂
在長傍崇陵樹影來

癸亥三月恭謁泰陵昌陵草木葱鬱佳氣猶在

喜賦二詩

鳳閣龍樓如□來二陵鬱：氣佳我滿山松柏葱萬
綠嗟爾王孫且莫哀

諸陵御道夾長楊遙望山中殿瓦黃金水橋瞻寶城
頂五雲松柏鬱蒼：

昌陵儉德規模減寶城不作不雕梁小殿三間無藻

繪幸留遺像見先皇

輓翁張夫布政

碧山學士富文采一別驚心戊戌時
孔李通家經累世韋平蘊德自多奇
婆娑生意東陽盡搖落長年宋玉悲
豈意與君成永訣共傷世異與時移

癸亥三月廿五日在保定乘飛機空中御風神
為天游口占示善伯

飄：乎我今日又上青天升騰虛空凌跨紫烟俛視
人世臨睨山川迴旋霄漢翱翔碧落若羽化而登仙
松林若芥苗人馬若蟻旋峻嶺若丘垤長河若虫涎
下觀保定十里之大城若一方器之在埏其中崇樓
傑閣若覆杯市廛壠畝若井田乘雲乍抑揚御風更
上仙忽逍遙夫月宮乃巡歷夫木土火金水之星躔
登太陽口天子之殿同太微紫微天市之垣入北極

之辰而四眺乃升晃昱而窮遊太元之元回盼吾地
之渺小曾不逮□巢蚊睫螭螟之末孫乃為爭蝸角
之微末曰弄蠻觸之兵鋌自爾王霸而高視甚于南
柯蟻鬪之夢焉吾非斯人之徒與而誰與哀生民而
救旃不願居天上仍遠處人間忽颺墜于吾地遂轉
輪於人寰迴望諸天遊戲事世界無量劫經賢

豐台道上與鄭昆池別感賦

豐台垂柳萬千絲
客裡揮巾傷別離
送自洛陽二千里
情深誰似鄭昆池

豐台車上口占贈陸繡山

繡山性至孝求忠即其門
才名久秀發沉勇自不言
鷹隼翔雲霄驂騶出風塵
相期走雷霆精銳救國民
林畏老自京來津慰問感深高義贈以詩

數年不見最相思
七十老翁來贈詩
相見無多情已

至淒然祇詒謁陵時

題文定公五同會圖

君九世兄為蒿隱先生哲嗣文行俱美克亢其宗國

變躬耕高蹈遇於天津出其先文定公五同會圖屬題

面目猶存五老峯鄉閭文行又相同祇今土室藏遺像如肅清高九老中

題王文敏公遺筆

王文敏公論交于卅六年前當時吾館于盛祭

酒伯希意園公日來過從談金石品書畫至樂
庚子余在海外聞公從容就義余哀之有句曰
節義惟聞兩祭酒事閱數十年漢章世兄乃以
公遺筆屬題追思故人既哀既敬乃題此詩

儒雅風流國子師意園品畫憶當時聯茵永失論文

友

戊子吾初上書公見吾文于意園即推贈扇猶懷
許為京師所無且為點定數字改數句

送別詩

乙未冬出京公以詩扇贈行有五嶺山頭月
半灣照人今古幾來還句其餘今忘矣此扇

珍藏之後封
沒子戊戌

數字君臣存大義百年交舊有餘悲應

同乃木留遺筆長挂辟雍松柏枝

題子銘都護御筆三秋圖

冷艷寒香五色班遙從天上下人間百經霜露猶開
放玉宇瓊樓高處遠

游大明湖登歷下亭

城墻一角水拖藍畫艇穿蘆垂柳鬢歷下亭前湖水

瑟濟南風景似江南

游千佛山

積石巖：擁碧鬚無言千佛忘人間
齊烟九點河水曲
泰岱北行來華山

十年前贈王豹帥詩湄午世兄裝成再題

班春廿載徧邊荒
斬佞封章請上方
拚捨臣身真味
死莫迴天聽竟崩
亡使君艘艦遺民滿
故國山河涕

淚長把酒來看須磨月當求寶劍壓歸裝

題湖洲墨竹大幀

雨葉風枝生氣動渭川千畝欲吞胸淨因緣傳可
處一枝跋尾化為龍

五月十四日遊青島月夜驅車繞島一周口占
二首

海不揚波夜月妍齊人歸我汶陽田輿輪徐動周青

島燈火滿山林滿烟
島嶼幽深是會泉海山樓閣似羣仙月明穿過櫻花
路尚想花開感往年

題岳武穆寫扇二詩贈吳子玉

古者將在外君命有所不受春秋大夫出疆有
可以安國家定社稷者專之可也惜武穆不知
之

金陀舊史合重編遺印傳今八百年團扇寄將吳子
玉揚風應合洗青天

報國精忠善用軍金牌十二對斜曛可憐不飲黃龍
酒二聖迎還集大勛

青島會泉石磯望海觀潮高至數丈異觀也
海水冥濛望石磯怒濤高拍入雲飛飛帆渺：和雲
水島嶼青：日落時

六月廿七日暮再觀潮

濤頭撞石涌成雲浩々懷山不可分
萬馬奔騰飛雪走千龍轟鬪震雷聞
白旂引隊爭先上縞甲登陣奏
大勛忽現雪山在頃刻如遊冰海對斜曛

癸亥六月北戴河望海

山徑迴環縱馬蹄槐花香夾路東西
登山立馬望東海碧浪如膏□樹齊

癸亥秋九月登華山頂作

太華峯頭踏碧鬟餐霞三日不思還帝釋岩高謝世
路蓮華界妙豈人間騎龍青天覽日月聞鶴碧夜撫
河山即未成仙樂長隱石泉齒：松柏頑

癸亥除夕遠遊歸滬作

太華終南踏窈蒼漢唐舊蹟入詩囊青嵩遠訪箕穎
讓黃鶴俯臨江漢湯波撼君山吸雲夢雪封岳麓渡

瀟湘九華廬阜雲中望除夕還家夢一場

題鎮江北固山下太史慈墓

盪決衝圍救孔融神亭擲戟氣何雄報恩萬死酬知
已擇主終身效至忠一代英姿似公瑾千秋信義類
臧洪我題君子延陵墓長照江流豈論功

去歲蒙上恩賞御書天游堂三字頃來青島甚
願移來

化人夙昔作天游想入乾坤到十洲
睿藻留題草堂上欲移海島五雲浮

遊青島謁恭王殿下則已遷大連以青島風景
極佳盛暑不熱因租房避暑殿下以家具什
器假我遂得安居感賦

東平去後我方來再入梁園頻溯洄
青島海山萬千綠懷人落日更登臺

家居豈可付纖兒借與鄒枚好護持
隱几聽濤望東海索頭授簡想當時

偕龍積之訪陶隱居墳草間三斷石翻之磨洗
得文認為唐碑

落日荒蕪踏錦墩無碑人道隱居墳
神仙亦死空遺跡曠有顏垣對玉晨

草間斷石得殘碑頻煩磨洗認唐時
額篆楷文千載

物應同寶衆寶存之

十三日偕積之弟訪華陽洞

地肺山中路幾千華陽洞口訪神仙洞門已閉仙人
渺落盡碧桃幾幾年

十四日夕與錢凝踏月上茅山自印宮至白雲
觀橫過積金峯月色佳絕

暮靄歸來月上峯兩山烟合隱蒼松飛泉落：馬蹄

得一路烟中聽晚鐘

夜度雲關過印宮頽垣壞殿月明中
騎驢直過積金頂
睨視山河煙霧濛

甲子元旦薇女與諸孫度歲于游存廬璧女與
諸孫亦歸

華嵩歸來已除夕六十七翁垂古稀
淑氣雨薰花竹醉
歲朝烟擁栢松飛
中原甲子天心復
外史庚申國

事非更喜立春遇元日相逢吉語在璇璣

甲子元夕一天園山巔無障礙壇放煙火與同
璧同凝同倓及昌婚俤俸邦鳳四孫飲酒傳
花惜微不來

無障礙壇高幾層中元甲子上元燈酒籌羯鼓花無
賴火樹金枝電迸騰兒女園林離竟合微塵世界愛
無憎同微去歲曾來此今話團團猶未能

重游青島示佳曾孫

海氣蒼蒼：島嶼迴山巔樓閣抗崔嵬茂林峻嶺百馳
道重入仙山畫裏來

重陽懷薑齋時在港

菊滿東籬作畫圖太平山下問潛夫重陽登望無高
處薇蕨無多可餓無

孟符賢兄為戊戌同難至交累其久錮每念惻

惻違離十七年重見滬上話舊悽惻奉贈詩
即步原韻送入都

豈圖重見話觚稜尚記同舟託李膺鈞黨石交相累
錮年時玉几共傷憑滅亡從古嗟褒姒不用于今老
范增感蓋涕洟談戊戌送君落日哭崇陵

丙寅八月十一日遊香山靜宜園

來青軒闕自金時千載離宮松柏披臺殿抗山今據

盡只餘古塔綠琉璃

游頤和園

七里長廊到石船排雲層殿上通天
龍漉流作昆明水游客傷心宮樹烟

仁壽殿卅年早朝地感賦

御床端嶮抗丹青銀燭當年記早朝
卅載重來仁壽殿黃簾不捲柏蕭蕭

游玉瀾堂昔幽德宗所德菱云德宗談我輒言
不受官只為救國是俠士五十餘次

玉瀾堂裏昔囚堯欄檻摩；久寂寥俠士頻呼為救
國微臣感痛望青霄

丙寅八月十二遊北海感賦

五龍亭下盪輕舟把酒漪瀾堂上遊誰識金人仙掌
露金仙當日淚曾流

十四日游湯山

垂楊甃：夾御堤十橋三島
故宮淒湯泉仍沸無黃
瓦蓮滿荷塘雲水迷

游豐澤園

七字廊前春藕齋瓊樓玉宇五雲排
豈知天上神仙
闕踏徧人間士女鞋

丙寅中秋登白塔感賦

碧照樓前打槩行
秋高白塔氣澄清
宮城烟樹西山影
畱與行人看月明

丁卯二月五日七十覽揆承恩賜壽紀事述懷

七章

海王星現十年時
道光二十八年西一八四六年
始發現海王星在我生十年日地

春迴覽揆期出世
可曾大事為行年
竟得古人稀易終
未濟仍無悶書創
大同誰見知無量
諸天八千返

衆生不救欲何之

童稚嬉游嘆白鬚杖朝豈意到潛夫

正月十三日赴行在祝嘏優詔

命免塵：世界愛憎過劫：人天成壞但播耨迦觀

奚足感

播耨迦為天眼看他世界

維摩詰病豈能無

半月來

金身

萬億隨時現壽者短長何喜吁

萬木扶疏講舍居憂時七上萬言書公車抗疏爭連

軫上相虛懷枉傲廬

馬江敗後第一上書以日圖高麗俄窺遼東請變法急救翁常

熟不肯代遞及東敗吾合公車十餘人上書車馬塞
達常熟親來南海館謝過謂舉朝無一人言者故不
敢信不代遞然後之推轂謂過臣百學勵自強聯俊
倍即由此然戊戌事亦自此始也
又會開保國盛冠裾乙未後與朝士有志者沈子襄
陳次亮諸公開強學會張文襄
袁世凱等全國名士咸集既開保國會于京師一日
集者數百若開不纏足會于上海吾女同徽與幼博
弟主之行維新變法先皇業戊戌無成罪在余
于六省
四州百國徧輶軒海外奔亡十六年車馬轍環天下
迹甌瓠樂採地中仙滄溟忽竭龍無六華表歸來鶴

化煙恢復空思丁巳事美森幽處十年前

丁巳十
四督
聯
盟
後

復口浙督楊善德力請吾自為總理乃可成將合各
督聯舉我吾力辭惟擬立憲民權詔書五十道中有
所有文武百官各仍其任十字而忠武左右不能安
反側誤易疆帥遂令今萬劫弥深先為印度內爭名曰
俄亂事敗吾避居美使館高
木幽陰名曰美森館凡半歲

既來斯世皆吾與未免多情惻我心乘願救人甘滅
溺驚魂憂國墮幽陰吉凶不忍同民患憂樂何先恐
陸沉我是化人亦煩惱雲中臨晚怵深：

壽人笙磬想韶誦廣樂模糊可得聽烈士剩携如意
舞愚公志欲山淵平醉天似欲剪鶉首避地終須學
管寧七十年中捉影事霞雲滅幻月空明
滿地干戈慘：民乾坤毀矣痛蒙塵天乎人間是何
世命也我生逢不辰兒女索離幸懼聚文章頌禱感
交親自天賜壽喜為食笋木逢場興有神

人必有代逝往來無古今蓋人天歷劫朱壞
考中國土典止盛衰有數不觀乎寶壺百
二燔為灰燼文豈柯坎自古為然其能留存於
世者不徒以吟詠見長必也學行氣節識
見志趣為世所景仰乃能懸日月而不
磨此杜詩所以光燦千古如戊戌之禍先君身

當予衝以政家室流亡戎卒完卵二十餘
年流離瑣尾道亡海外艱苦備嘗而救國
救民之心予時或已於晚年所作詩得採風
尚俗而外多借引列強新進之思潮以喚
起國人之迷夢怨憤之詞有似少陵蓋際遇
及環境皆多相類也先君一生此治除天人

之學外即以國計民生為重詞章之學其能
純耳矣有詩作雖小鍾岳而次鬱鬱淋漓快
乎如海波之渺乎涯際但送經受亂聖道從
焉常縹緲兮絳帙已蒙塵陵散矣梁君啟超
為手寫四卷夙以於世成成以必詩作詩多
詩散失殊堪痛惜壁不敏雖紹述焉方而也

庭同訓深恐青箱不傳遺篇湮沒是以搜
集遺章考為十五卷倩崔君斯哲錄寫刊
行於世世之讀其詩者作中國維新史觀可
也作世界風俗詩觀亦可也

乙亥臘月女康同璧敬跋

詩曰伐木丁丁鳥鳴嚶嚶即易言聲相應氣相求也
南海先生講學蒿木草堂聲出羊石全國景之哲生
也晚每以未獲執弟子禮爲恨然而公沙穆之遊太
學也定交在杵臼之間孔文舉之勵風義也忘年結
爾汝之友古人如詔我矣民元後先生自海外歸時
哲領廣州地方審判廳事得友人之介獲謁于香島
藉聞經史金石之訓不啻及門也民六年秋哲移官

江蘇退食之下學吟詠習臨池初業無方知先生遷
滬趨而請教先生不以爲不可教而不教也凡尊碑
卑唐之旨平腕豎鋒虛掌實指之理一一晰論之其
於詩也曰取法貴上詩經騷選漢晉古詩多讀多擬
焉久之當有進也余性雖拙而頗知恒逾年抄所詠
古風寄呈教正先生覆曰詩才高妙絕少瑕處若再
取煉於大謝取幽於山谷取難於昌黎取艷於玉溪

浸淫於騷選濃郁於子史則大成矣及九元旦哲贈
先生詩中有側身杜甫空懷古障面元規別有塵之
句先生貽書曰惠書及詩感慨激昂元規障面杜甫
側身想見高懷遠志也側望不任莊子所謂父母豈
欲我如是哉天地豈欲我如是哉然而至於此者命
也夫順受其正安之而已先生雖連年不得志而胸
襟曠達毫無怨懟真天游化人哉余他業屢遷唯學

書則十年如一日曾以所寫真書請正先生曰書極
樸厚後補以柔和專學鄭文公可也逾年將隸書行
草寄先生教正則謂書法日進以隸爲佳行草板着
宜取聖教序及閣帖之妙美者臨三四月然後示我
當有以進君也昔周德純就學陽明子陽明子詔以
歸足火力吾將儲儋石之水以俟再見噫先生之進
之也豈謂是哉十一年春哲調山右過滬謁先生先

生謂哲篆書力頗透紙有毛公鼎石鼓風再致力於
瑯琊西漢分合篆隸陶鑄爲之奇態異變雜沓筆端
斯成家云是又望道而未之見不得不重勞他山錯
此頑石也自後東西萬里親炙爲艱加叀歲月不居
道山空仰沉沉旦夢渺渺文琴不禁神往者久矣今
冢先生詩未得新理異態寧不自知然既不克叩在
天之靈從而就正而愴懷前緒又寧忘警效之如新

我至案牘迫人校對時忙難免訛脫則讀者諒之耳
中華民國二十五年歲次丙子十二月後學崔斯哲
跋於端州

門人張鵬一初校
門人羅惇爰校
後學何天桂校
女同薇編校
同璧

